

卷七

傷寒典上

卷八

傷寒典下

景岳全書

景岳全書傷寒典目錄

須集

卷之七

傷寒 上

經義 一

傷寒總名 二

初診傷寒法 三

論脈 四

風寒辨 五

傷寒三證 六

六經證 七

傳經辨 八

附合病併病

陽證陰證辨 九

三陽陽明證 十

兩感 十一

表裏辨 十二



寒熱辨 十三

論汗 十四

論吐 十五

論下 十六

看目 十七

舌色辨 十八

飲水 十九

三陽陰證辨 二十

再論陰證陽證及李子建傷寒十勸之害 二十一

論傷寒古治法 二十二

論古法通變 二十三

麻黃桂枝辨 二十四

論今時皆合病併病 二十五

治法 二十六

論虛邪治法 二十七

補中亦能散表 二十八

寒中亦能散表 二十九

傷寒三表法 三十

傷寒無補法辨 三十一

病宜速治 三十二

卷之八

傷寒下

溫病暑病 三十三

發斑 三十四

發黃 三十五

發狂 三十六

風濕 三十七

結胸 三十八

陰厥陽厥 三十九附  
藏厥虵厥

識語鄭聲 四十

衄血 四十一

畜血 四十二

熱入血室 四十三

胸脇腹滿 四十四

嘔吐噦證 四十五

勞力感寒 四十六

虛證 四十七

動氣 四十八

戰汗 四十九

頭汗 五十

吐衄 五十一

腹痛 五十二

下利 五十三

協熱下利 五十四

小便 五十五

死證 五十六

傷寒逆證賦 五十七

傷寒治例 五十八

景岳全書傷寒典目錄終



景岳全書卷之七

傷寒典

須集

會稽

張介賓

會卿著

會稽

魯

超

謙菴訂

傷寒上

經義

水熱穴論帝曰人傷於寒而傳為熱何也岐伯曰夫寒盛則生熱也○內經傷寒諸義并諸治法之未備者俱補載瘟疫門

所當參閱

傷寒總名二

黃帝曰、今夫熱病者、皆傷寒之類也。又曰、凡病傷寒而成溫者、先夏至日爲病溫、後夏至日爲病暑。此皆內經之明言也。故凡病溫病熱而因於外感者、皆本於寒。卽今醫家皆謂之爲傷寒。理宜然也。近或有以溫病熱病謂非真傷寒者、在未達其義耳。

○初診傷寒法三

凡初診傷寒者、以其寒從外入、傷於表也。寒邪自外而入、必由淺漸深。故先自皮毛、次入經絡、又次入筋骨、而後及於藏府。則病日甚矣。故凡病傷寒者、初必發熱憎寒、無汗、以邪閉皮毛、病

在衛也。漸至筋脉拘急、頭背骨節疼痛、以邪入經絡、病在營也。夫人之衛行脉外、營行脉中、今以寒邪居之、則血氣混淆、經絡壅滯、故外證若此、此卽所謂傷寒證也。自此而漸至嘔吐不食、脹滿等證、則由外入內、由經入府、皆可因證而察其表裏矣。若或肌表無熱、亦不憎寒、身無疼痛、脉不緊數者、此其邪不在表、病必屬裏、凡察傷寒、此其法也。

○論脉 四

傷寒之邪、實無定體、或入陽經、氣分、則太陽爲首、或入陰經、精分、則少陰爲先、其脉以浮緊而有力、無力、可知表之虛實、沉緊



而有力無力、可知裏之虛實、中而有力無力、可知陰陽之凶吉、  
診之之法、當問證以知其外、察脉以知其內、先病爲本、後病爲  
標、能參合脉證、而知緩急先後者、乃爲上工。

一 診法曰、浮脉爲在表、故凡脉見浮緊而數者、卽表邪也、再加  
以頭項痛、腰脊強等證、此卽太陽經病、當求本經輕重而解  
散之。

一 脉見洪長有力、而外兼陽明證者、卽陽明在經之邪也、宜求  
本經之寒熱以散之。

一 脉見弦數、而兼少陽之證者、卽少陽經半表半裏之病、宜和

解而散之

一沉脉爲在裏病屬三陰詳具後六經證辨中但沉數有力是卽熱邪傳裏也若表證深入而內見大滿大實陽邪熱結等證治當從下也

一沉緊無力而外無大熱內無煩渴等病此陰證也若或畏寒厥冷及嘔吐腹痛瀉痢者此卽陰寒直中治宜溫中也

一脉大者爲病進大因邪氣勝病日甚也脉漸緩者爲邪退緩則胃氣至病將愈也此以大爲病進固其然也然亦有宜大不宜大者又當詳辨如脉體本大而再加洪數此則病進之

脉不可當也。如脉體木小，因服藥後而漸見滑大有力者，此自陰轉陽，必將汗解，乃爲吉兆。蓋脉至不鼓者，由氣虛而然。無陽豈能作汗也。後論汗條中有按當益闕之。

仲景傷寒論曰：脉有陰陽者，何謂也？曰：凡脉浮大數動滑，皆陽也；沉濇弱弦微，皆陰也。○諸脉浮數而發熱，惡寒身痛不欲飲食者，傷寒也。若酒漸惡寒，飲食如常而痛偏一處者，必血氣壅遏不通，成癰膿也。○寸口脉浮爲在表，沉爲在裏，數爲在府，遲爲在藏。○寸關尺三部浮沉大小遲數同等，雖有寒熱不解者，此脉陰陽爲和平，雖劇必愈。○其脉浮而汗出如



流珠者陽氣衰也○脉瞥瞥如羹上珠者陽氣微也○脉縈  
縈如蜘蛛絲者陽氣衰也○脉綿綿如瀉漆之絕者亡其血  
也○其脉沉者榮氣微也○若脉浮大者氣實血虛也○脉  
微緩者爲欲愈也○陽脉浮陰脉弱者爲血虛血虛則筋急  
也○脉微弱而惡寒者此陰陽俱虛不可更發汗更吐更下  
也○陰證無脉溫之而脉微續者生暴出者死○陰病見陽  
脉者生陽病見陰脉者死

論曰寸脉微名曰陽不足陰氣上入於陽中則灑淅惡寒也尺  
脉微名曰陰不足陽氣下陷入陰中則發熱也○寸口脉微

而瀉微者衛氣不行瀉者榮氣不足衛氣衰面色黃榮氣不足面色青榮爲根衛爲葉榮衛俱微則根葉枯槁而寒慄欬逆唾腥吐涎沫也

論曰緊脈從何而來曰假令亡汗若吐以肺裏寒故令脈緊也

○假令欬者坐飲冷水故令脈緊也○假令下利以胃中虛冷故令脈緊也○按此言緊者卽弦搏不軟之謂蓋單言其緊而無滑數之意乃陽明胃氣受傷之脈故主爲陰寒之證若緊而兼數則必以外邪所致

○愚按浮爲在表沉爲在裏此古今相傳之法也然沉脈亦有表

證此陰實陽虛寒勝者然也浮脉亦有裏證此陽實陰虛水  
虧者然也故凡欲察表邪者不宜單據浮沉只當以緊數與  
否爲辨方爲的確蓋寒邪在表脉皆緊數緊數甚者邪亦甚  
緊數微者邪亦微緊數浮洪有力者邪在陽分卽陽證也緊  
數浮沉無力者邪在陰分卽陰證也以緊數之脉而兼見表  
證者其爲外感無疑卽當治從解散然內傷之脉亦有緊數  
者但內傷之緊其來有漸外感之緊發於陡然以此辨之最  
爲切當其有似緊非緊但較之平昔稍見滑疾而不甚者亦  
有外感之證此其邪之輕者或以初感而未甚者亦多見此



脉是又不可不兼證而察之也。若其和緩而全無緊疾之意，則脉雖浮，大自非外邪之證。

按陶節菴曰：夫脉浮當汗，脉沉當下，固其宜也。然其脉雖浮，亦有可下者，謂邪熱入府，大便難也。設使大便不難，豈敢下乎？其脉雖沉，亦有可汗者，謂少陰病，身有熱也。設使身不發熱，豈敢汗乎？若此之說，可見沉有表而浮亦有裏也。

風寒辨 五

凡病傷寒者，本由寒氣所傷，而風即寒之帥也。第以風寒分氣，令則風主春而東，寒主冬而北，以風寒分微甚，則風屬陽而淺。

寒屬陰而深然風送寒來寒隨風入透骨侵肌本爲同氣故凡  
寒之淺者卽爲傷風風之深者卽爲傷寒而不淺不深半正半  
邪之間者卽爲瘧疾其有留於經絡而肢體疼痛者則爲風痺  
然則傷風也傷寒也瘧疾風痺也皆風寒之所爲也觀靈樞九  
宮八風篇及歲露論所載俱甚言虛邪賊風之爲害口問篇言  
風成爲寒熱此皆指風爲寒邪也卽如冬傷於寒者宜乎其爲  
傷寒也若春夏秋三時之感冒則孰非因寒亦孰非因風而入  
之故仲景曰凡傷寒之病多從風寒得之始因表中風寒入裏  
則不消矣未有溫覆而當不消散者豈非風寒本爲同氣乎內

經曰謹候虛風而避之故聖人日避虛邪之道如避矢石然邪弗能害此之謂也此杜漸防微之道也

傷寒三證六

夫傷寒爲病蓋由冬令嚴寒以水冰地裂之時最多殺厲之氣人觸犯之而卽時病者是爲正傷寒此卽陰寒直中之證也然惟流離窮困之世多有之若時當治平民安飽煖則直中之病少見此傷寒之一也○其有冬時感寒不卽病者寒毒藏於營衛之間至春夏時又遇風寒則邪氣應時而動故在春則爲溫病在夏則爲暑病是以辛苦之人春夏多溫熱病者皆由冬時

觸寒所傷故隨氣傳變本非卽病正傷寒之屬所當因其寒熱而隨證調治之此傷寒之二也○又有時行之氣者如春時應暖而反寒夏時應熱而反涼秋時應涼而反熱冬時應寒而反溫此非其時而有其氣是以一歲之中長幼之病多相似者是卽時行之病感冒虛風不正之氣隨感隨發凡稟弱而不慎起居多勞倦者多犯之此傷寒之三也凡此三者皆傷寒之屬第其病有不同治有深淺苟不能辨則必致悞人

○○六經證 七

太陽經病頭項痛腰脊強發熱惡寒身體痛無汗脈浮緊以太



陽經脉由脊背連風府故爲此證此三陽之表也

陽明經病爲身熱目疼鼻乾不眠脉洪而長以陽明主肌肉其脉挾鼻絡於目故爲此證此三陽之裏也

少陽經病爲胸脇痛耳聾寒熱嘔而口苦咽乾目眩脉弦而數以少陽之脉循脇助絡於耳故爲此證此二陽三陰之間也由此漸入三陰故爲半表半裏之經

太陰經病爲腹滿而吐食不下噤乾手足自溫或自利腹痛不渴脉沉而細以太陰之脉布胃中絡於噤故爲此證

少陰經病爲舌乾口燥或自利而渴或欲吐不吐或引衣踏臥

心煩但欲寐其脈沉以少陰之脈貫腎絡於肺繫舌本故爲此證

厥陰經病爲煩滿囊縮或氣上撞心中疼熱消渴饑而不欲食食卽吐蠱下之利不止脈沉而弦以厥陰之脈循陰器而絡於肝故爲此證

成無已曰熱邪自太陽傳至太陰則腹滿而噎乾未成渴也傳至少陰則口燥舌乾而渴未成消也傳至厥陰而成消渴者熱甚能消水故也凡飲水多而小便少者謂之消渴肝居下部而邪居之則木火相犯所以邪上撞心木邪乘土則脾

氣受傷所以饑不欲食食即吐虵脾土既傷而復下之則脾氣愈虛所以利不止

正陽明府病者由表而傳裏由經而入府也邪氣既熾故爲潮熱自汗譏語發渴不惡寒反惡熱揭去衣被揚手擲足或發斑黃狂亂五六日不大便脉滑而實此實熱已傳於內乃可下之若其脉弱無神或內無痞滿實堅等證又不可妄行攻

下

仲景曰尺寸俱浮者太陽受病也當一二日發○尺寸俱長者少陽受病也當二三日發○尺寸俱弦者少陽受病也當三

四日發此三陽皆受病未入於府者可汗而已○尺寸俱沉細者太陰受病也當四五日發○尺寸俱沉者少陰受病也當五六日發○尺寸俱微緩者厥陰受病也當六七日發此三陰俱受病已入於府者可下而已

成無已註曰三陽受邪爲病在表法當汗解然三陽亦有便入府者入府則宜下故云未入於府者可汗而已三陰受邪爲病在裏於法當下然三陰亦有在經者在經則宜汗故云已入於府者可下而已

太陽證似少陰者以其發熱惡寒而脉反沉也○少陰證似太



一陽者以其惡寒脉沉而反發熱也。○仲景曰太陽病發熱頭  
一痛脉反沉身體疼痛若不瘥者當救其裏宜四逆湯。○少陰  
一病始得之反發熱脉沉者宜麻黃附子細辛湯。

按此二證謂病在太陽其脉當浮而反沉者因正氣衰弱裏  
虛而然故當用四逆湯此裏虛不得不救也病在少陰證當  
無熱而反熱者因寒邪在表猶未傳裏故當用麻黃附子細  
辛湯此表邪不得不散也此二證者均屬脉沉發熱但其有  
頭疼故爲太陽病無頭疼故爲少陰病第在少陰而反發熱  
一者以表邪浮淺可以汗解其反猶輕在太陽而反脉沉者以

正氣衰微難施汗下其反爲重由此觀之可見陽經有當溫裏者故以生附配乾薑補中自有散意陰經有當發表者故以熟附配麻黃發中亦有補焉此仲景求本之治其他從可知矣

○傳經辨

入

附合病併病義

傷寒傳變不可以日數爲拘亦不可以次序爲拘如內經言一日太陽二日陽明三日少陽之類蓋言傳經之大槩非謂凡患傷寒者必皆如此也蓋寒邪中人本無定體觀陶節菴曰風寒之初中人也無常或入於陰或入於陽非但始太陽終厥陰也

或自太陽始。日傳一經。六日至厥陰。邪氣衰。不傳而愈者。亦有  
不罷再傳者。或有間經而傳者。或有傳至二三經而止者。或有  
終始只在一經者。或有越經而傳者。或有自少陽陽明而入者。  
或有初入太陽。不作鬱熱。便入少陰而成真陰證者。所以凡治  
傷寒。不可拘泥。但見太陽證。便治太陽。但見少陰證。便治少陰。  
但見少陽陽明證。便治少陽陽明。此活法也。○又有合病併病  
之證。曰合病者。兩經或三經齊病。不傳者爲合病。併病者。一經  
先病未盡。又過一經者。爲併病。所以有太陽陽明合病。有太陽  
少陽合病。有陽明少陽合病。有三陽合病。三陽若與三陰合病。

卽是兩感。所以三陰無合併例也。卽仲景亦曰：日數雖多，但見表證，而脉浮緊者，猶宜汗之。日數雖少，但見裏證，而脉沉實者，猶宜下之。誠爲不易之論。故不可執定日數。謂一二日宜發表，三四日宜和解，五六日卽宜下。若或不知通變，因致悞人者多矣。故必真知其表邪未解，則當汗之。真知其胃邪已實，方可下之。真知其陰寒邪勝，自宜溫之。真知其邪實正虛，客主不敵，必須補之。但能因機察變，原始要終，而纖悉無遺者，方是活人高手。

仲景曰：傷寒一日，太陽受之，脉若靜者爲不傳，頗欲吐，若躁煩



脈數急者為傳也。○傷寒六七日無大熱其人躁煩者此為陽去入陰故也。○傷寒二三日陽明少陽證不見者為不傳也。○傷寒三日三陽為盡三陰當受邪其人反能食而不嘔此為三陰不受邪也。

○陽證陰證辨

九

凡治傷寒須先辨陽證陰證若病自三陽不能解散而傳入三陰則寒鬱為熱因成陽證蓋其初病必發熱頭痛脈浮緊無汗以漸而深乃入陰經此邪自陽分傳來愈深則愈熱雖在陰經亦陽證也其脈必沉實有力其證必煩熱熾盛此當攻裏或清

或下。隨宜而用。若內不有熱。安得謂之陽證乎。○若初起本無發熱頭痛等證。原不由陽經所傳。而徑入陰分者。其證或厥冷。或嘔吐。或腹痛瀉利。或畏寒不渴。或脉來沉弱無力。此皆元陽元氣之不足。乃為真正陰證。經曰發熱惡寒發於陽。無熱惡寒發於陰。此以傳經不傳經而論陰陽也。陰陽之治。又當辨其虛實如左。

一治傷寒。凡陽證宜涼。宜瀉。陰證宜補。宜溫。此大法也。第以經藏言陰陽。則陰中本有陽證。此傳經之熱邪也。以脉證言陰陽。則陽中最多陰證。此似陽之虛邪也。惟陰中之陽者。易辨。

而陽中之陰者爲難知耳如發熱狂躁口渴心煩喜冷飲水無度大便鞭小便赤喉痛口瘡聲粗氣急脉來滑實有力者此真陽證也其有身雖熱而脉來微弱無力者此雖外證似陽實非陽證觀陶節菴曰凡發熱面赤煩躁揭去衣被唇口赤裂言語善惡不避親踈虛狂假斑脉大者人皆不識認作陽證殊不知陰證不分熱與不熱須憑脉下藥至爲切當不問脉之浮沉大小但指下無力重按全無便是陰脉不可與涼藥服之必死急與五積散通解表裏之寒甚者必須加薑附以溫之又曰病自陽分傳入三陰者俱是脉沉妙在指下

有力無力中分有力者爲陽爲實爲熱無力者爲陰爲虛爲寒此節菴出人之見也然以余觀之大都似陽非陽之證不必謂其外熱煩躁微渴戴陽之類卽皆爲陰證也但見其元陽不足而氣虛於中雖有外熱卽假熱耳設用清涼消耗則中氣愈敗中氣旣敗則邪氣愈強其能生乎故凡遇此等證候必當先其所急人知所急在病而不知所急在命元氣忽去疾如絕絃呼吸變生挽無及矣治例另列後卷

一傷寒綱領惟陰陽爲最此而有悞必致殺人然有純陽證有純陰證是當定見分治也又有陰陽相平證如寒之卽陰勝



熱之卽陽勝或今日見陰而明日見陽者有之今日見陽而  
明日變陰者亦有之其在常人最多此證盤珠膠柱惟明哲  
者之能辨也然以陰變陽者多吉以陽變陰者多凶是又不  
可不察

凡病人開目喜明欲見人多譚者屬陽閉目喜暗不欲見人懶  
言者屬陰

論曰夫陽盛陰虛汗之則死下之則愈陽虛陰盛汗之則愈下  
之則死○又曰桂枝下咽陽盛則斃承氣入胃陰盛以亡○  
按此陰陽二字乃以寒熱爲言也陽盛陰虛言內熱有餘而

外寒不甚也。夫邪必入府，然後作熱。熱實於內，卽陽盛也。故再用溫熱以汗之，則死矣。陽虛陰盛，言寒邪有餘而蓄熱未深也。夫邪中於表，必因風寒。寒束於外，卽陰盛也。故妄用沉寒以下之，則死矣。所以陽盛者用桂枝，則斃陰盛者用承氣，則亡。

○三陽陽明證

十

仲景曰：病有太陽陽明，有正陽陽明，有少陽陽明，何謂也？答曰：太陽陽明者，脾約是也。正陽陽明者，胃家實也。少陽陽明者，發汗利小便，胃中燥煩，實大便難是也。問曰：何緣得陽明病？答曰：

太陽病發汗若下若利小便此亡津液胃中乾燥因轉屬陽明  
內實大便難此名陽明也問曰陽明病外證云何答曰身熱汗  
自出不惡寒反惡熱也

按此三陽陽明之證皆自經傳府胃家之實證也曰太陽陽  
明者邪自太陽傳入於胃其名脾約以其小便數大便鞭也  
正陽陽明者邪自陽明本經傳入於府而邪實於胃也少陽  
陽明者邪自少陽傳入於胃也胃爲府者猶府庫之府府之  
爲言聚也以胃本屬土爲萬物所歸邪入於胃則無所復傳  
鬱而爲熱此由耗亡津液胃中乾燥或三陽熱邪不解自經

而府熱結所成故邪入陽明胃府者謂之實邪土氣爲邪王於未申所以日晡潮熱者屬陽明也論曰潮熱者實也是爲可下之證又曰潮熱者此外欲解也可攻其裏焉又曰其熱不潮不可與承氣此潮熱屬胃可知也然潮熱雖爲可攻若脈浮而緊或小便難大便溏身熱無汗此熱邪未全入府猶屬表證仍當和解若邪熱在表而妄攻之則禍不旋踵矣成無已曰胃爲水穀之海主養四傍故四傍有病皆能傳入於胃入胃則更不復傳如太陽病傳之入胃則不更傳陽明陽明病傳之入胃則不更傳少陽少陽病傳之入胃則不更



傳三陰也

兩感 十一

病兩感於寒者一日則太陽與少陰表裏俱病凡頭痛發熱惡寒者邪在表口乾而渴者邪在裏二日則陽明與太陰表裏俱病身熱日痛鼻乾不眠者邪在表腹滿不欲食者邪在裏三日則少陽與厥陰表裏俱病耳聾脇痛寒熱而嘔者邪在表煩滿囊縮而厥水漿不入邪在裏凡兩感者或二日或六日營衛不行藏府不通昏不知人胃氣乃盡故當死也若此兩感雖為危證然不忍坐視其於拯溺救焚之計所不可免但當細察其證

亦自有緩急可辨。若三陽之頭痛身熱耳聾脇痛惡寒而嘔。此在表者。不得不解於外。其三陰之腹滿口渴。裏縮譫語。此在裏者。不得不和其中。若其和自外入。而外甚於裏者。必當以外爲主治。而兼調其內。若其和因虛襲。而元氣不支者。速宜單顧根本。不可攻邪。但使元陽不敗。則強敵亦將自解。其庶幾乎有可望也。此證變態非常。故不可鑿言方治。

按門人錢禎曰。兩感者。本表裏之同病。似若皆以外感爲言也。而實有未必盡然者。正以外內俱傷。便是兩感。今見有少陰先潰於內。而太陽繼之於外者。卽縱情肆慾之兩感也。太

陰受傷於裏而陽明重感於表者卽勞倦竭力飲食不調之  
兩感也厥陰氣逆於藏少陽復病於府者卽七情不愼疲筋  
敗血之兩感也人知兩感爲傷寒而不知傷寒之兩感內外  
俱困病斯劇矣但傷有重輕醫有知不知則死生係之或謂  
兩感證之不多見者蓋亦見之不廣而義有未達耳其於治  
法亦在乎知其由而救其本也此言最切此病誠發人之未  
發深足指迷不可不錄

表裏辨

十二

陽邪在表則表熱陰邪在表則表寒○陽邪在裏則裏熱陰邪

在裏則裏寒○邪在半表半裏之間而無定處則往來寒熱○邪在表則心腹不滿邪在裏則心腹脹痛○邪在表則呻吟不安邪在裏則躁煩悶亂○邪在表則能食邪在裏則不能食不欲食者邪在於表裏之間未至於不能食也○邪在表則不嘔不嘔邪在裏則煩滿而嘔凡初見心煩喜嘔及胸膈漸生痞悶者邪在表方傳裏也不可攻下○凡病本在表外證悉具而脉反沉微者以元陽不足不能外達也但當救裏以助陽散寒爲上策○前卷傳忠錄中有辨當互閱之

○△寒熱辨

十三



邪氣在表發熱者表熱裏不熱也宜溫散之邪氣在裏發熱者裏熱甚而達於外也宜清之

陽不足則陰氣上入陽中而爲惡寒陰勝則寒也宜溫之陰不足則陽氣陷入陰中而爲發熱陽勝則熱也宜清之

寒熱往來者陰陽相爭陰勝則寒陽勝則熱也蓋熱爲陽寒爲陰表爲陽裏爲陰邪之客於表者爲寒邪與陽相爭則爲寒慄邪之傳於裏者爲熱邪與陰相爭則爲熱躁其邪在半表半裏之間者外與陽爭則爲寒內與陰爭則爲熱或表或裏或出或入是以寒熱往來此半表裏之證也故凡寒勝者必

多寒熱勝者必多熱但審其寒熱之勢則可知邪氣之淺深也

經曰陽微則惡寒陰弱則發熱

仲景曰發熱惡寒者發於陽也無熱惡寒者發於陰也

○論汗十四

仲景論曰寸口脈浮而緊浮則爲風緊則爲寒風則傷衛寒則傷榮榮衛俱病骨節煩疼當發其汗也

曰三陽皆受病未入於府者可汗而已詳見前六經證中

曰太陽病脈浮緊無汗發熱身疼痛八九日不解表證仍在者

此當發其汗。○按此一證雖以太陽經爲言，然陽明少陽日久不解者，亦仍當汗散。但太陽爲三陽之表，而主通身之外證，故特舉太陽爲言也。

曰太陽病，頭痛發熱，身疼，腰痛，骨節疼痛，惡風，無汗而喘者，麻黃湯主之。

曰脈浮而數者，可發汗，宜麻黃湯主之。

曰太陽與陽明合病，喘而胸滿者，邪在表也，不可下，宜麻黃湯主之。

曰陽明病，脈浮無汗而喘者，發汗則愈，宜麻黃湯主之。

曰太陽病項背強几几無汗惡風者宜葛根湯王之

曰太陽與陽明合病者必自下利葛根湯王之

曰太陽中風脈浮緊發熱惡寒身疼痛不汗出而煩躁者大青

龍湯王之

曰太陽病發熱汗出惡風脈緩者名爲中風○太陽病頭痛發熱汗出惡風者桂枝湯王之

曰太陽病外證未解脈浮弱者當以汗解宜桂枝湯

曰陽明病脈遲汗出多微惡寒者表未解也可發汗宜桂枝湯

曰病如瘧狀日晡所發熱者屬陽明也脈浮虛者當發汗宜桂



一枝湯

曰太陰病、脈浮者、可發汗、宜桂枝湯。

曰厥陰證、有下利、腹脹滿、身體疼痛者、先溫其裏、乃攻其表、溫

一裏、四逆湯、攻表、桂枝湯。

曰下利後、身疼痛、清便自調者、急當救表、宜桂枝湯發汗。○按

一此以身疼痛者、爲表證、故當散之。

曰傷寒發汗解、半日許復煩、脈浮數者、可更發汗、宜桂枝湯主

之。

曰少陰病、始得之、反發熱、脈沉者、麻黃附子細辛湯主之。○按

此證脈雖沉而身反熱者正乃陰經之表證也故宜用此溫  
散

曰太陽病不解轉入少陽脇下鞅滿乾嘔不能食往來寒熱脈  
沉緊者與小柴胡湯

曰嘔而發熱者小柴胡湯主之

曰陽明病發潮熱大便溏小便自可胸脇滿者小柴胡湯主之

曰陰證不得有汗今頭汗出故知非少陰也可與小柴胡湯

曰二陽併病太陽初得病時發其汗汗出不徹因轉屬陽明續  
自微汗出不惡寒若太陽病證不罷者不可下下之爲逆如

此者可小發汗

按仲景表汗之條、縷悉尚多、今但述其切要者、凡二十四證、以見其宜否之法、而大意可得也、第其所用汗劑、不曰麻黃、則曰桂枝、此寒邪初感、溫散之妙法也、今後人以麻黃桂枝爲異物、而不敢用、而復有強爲之釋者、謂此在仲景、乃爲隆冬、直中陰寒者、設耳、而不知四時陰勝之邪、皆最宜者也、嗚呼、仲景之下、再無仲景、可見醫中之品矣、

一各經表證、凡有汗出不徹者、皆未足言汗、蓋邪未盡去、其人必身熱不退、而仍覺躁煩、或四體痠疼、坐臥不安者、以汗

出不徹故也。何從知之。但診其脈緊不退。及熱時乾燥無汗者。卽其證也。仍宜汗之。如果汗透。而熱仍不退。或汗後身熱愈甚者。是卽所謂陰陽交。魂魄離。大凶之兆也。

一凡汗之不徹者。其故有三。如邪在經絡筋骨。而汗出皮毛者。此邪深汗淺。衛解而營不解。一不徹也。或以十分之邪。而去五分之汗。此邪重汗輕。二不徹也。或寒邪方去。猶未清楚。遽起露風。而因虛復感。此新舊相踵。三不徹也。凡遇此者。當辨其詳。而因微甚。以再汗之。

一凡旣愈復熱者。其故有四。或以邪氣方散。胃氣未清。因而過



食者是爲食復此其一也或以表邪方解原不甚虛有過慎者輒加溫補是誤補而復此其二也若此二者所謂食入於陰長氣於陽以致衛氣復閉陽邪復聚而然表邪既復仍宜汗也又或有以新病方瘳不能調攝或勞傷脾陰因而復熱者是名勞復此其三也或不慎房室因而再感者是名女勞復此其四也若此二者所謂陰虛者陽必溲之而然此則或從補或從汗當因變制宜權其緩急而治分虛實也

論曰傷寒差後更發熱者小柴胡湯主之脈浮者宜汗解之脈

沉實者宜下解之

取汗之法當取於自然不宜急暴但服以湯劑蓋令溫煖使  
得津津微汗稍令久之則手足俱周徧身通達邪無不散矣  
若一時逼之致使如淋如洗則急遽間衛氣已達而營氣未  
周反有不到之處且恐大傷元氣非善法也余嘗見有子病  
者其父母愛惜之甚欲其速愈且當溫煖之令覆以重被猶  
恐不足而以身壓其上子因熱極呼叫其父母曰猶未也須  
再出些方好及許久放起竟致凶陽而斃之是但知汗出何  
妨而不知汗之殺人此強發之鑑也○又有邪本不甚或挾  
虛年衰感邪等證醫不能察但知表證宜解而發散太過或

一誤散無效而屢散不已因而卽被其害者有之或邪氣雖去  
一遂致胃氣大傷不能飲食而羸憊不振者有之此過汗之戒  
也○凡發汗太過一時將至亡陽或身寒而慄或氣脫昏沉  
等候速宜煎獨參湯一兩許飲之或甚者以四味回陽飲速  
爲挽回庶可保全否則恐致不救

一脈有忌汗者如傷寒論曰太陽病發熱惡寒熱多寒少脈微  
弱者此無陽也不可發汗○弦爲陽運微爲陰寒上實下虛  
意欲得溫微弦爲虛不可發汗發汗則寒慄不能自還○傷  
寒四五日脈沉而喘滿沉爲在裏不可汗汗亡津液必大便

難而讖語○少陰病脈微不可發汗以亾陽故也○傷寒脈微而惡寒者此陰陽俱虛不可更發汗更吐下也○尺脈弱而無力者切不可汗下○尺中遲者不可發汗以榮氣不足血少故也

景岳子曰按以上忌汗諸脈可見仲景大意故凡治傷寒但見脈息微弱及沉細無力者皆不可任意發汗然欲去外邪非汗不可而仲景云脈微弱者不可發汗夫脈弱非陽既不可用寒涼而寒邪在表又不可用攻下然則舍汗之外又將何法以治此表邪乎不知溫中卽可以散寒而強主卽可以



逐寇此仲景之意豈不盡露於言表而明悟者當心會之矣  
且凡病外感而脉見微弱者其汗最不易出其邪最不易解  
何也正以元氣不能托送卽發亦無汗邪不能解則愈發愈  
虛而危亾立至矣夫汗本乎血由乎營也營本乎氣由乎中  
也未有中氣虛而營能盛者未有營氣虛而汗能達者脉卽  
營之外候脉旣微弱元氣可知元氣愈虛邪愈不解所以陽  
證最嫌陰脉正爲此也故治此者但遇脉息微弱正不勝邪  
等證必須速固根本以杜深入專助中氣以托外邪必使真  
元漸克則脉必漸盛白微細而至滑大白無力而至有神務

令陰脉轉爲陽脉、陰證轉爲陽證、斯時也、元氣漸克、方是正復邪退、將汗將解之佳兆、故凡治表邪之法、有宜發散者、有宜和解者、有宜調補營衛者、如果邪實而無汗、則發散爲宜、有汗而熱不除、則和解爲宜、元氣虛而邪不能退、則專救根本、以待其自解、自汗爲宜、此逐邪三昧萬全之法也、今有庸流、但見其外、不見其內、每不論證之陰陽、脉之虛實、但知寒涼可以退熱、但知發散可以解表、不知元陽一敗、則土崩瓦解、立見潰矣、反掌殺人、而終身不悟、是真下愚不移者也、若而人者、亦可謂之醫乎、

一證有忌汗者。如傷寒論曰。當汗者下之爲逆。當下者汗之爲逆。○下利清穀不可攻表。汗出必脹滿。以重亾津液也。○汗家不可發汗。○陽虛不得重發汗。○衄家不可發汗。○亾血家不可發汗。○淋家不可發汗。發汗必使血。○咽喉乾燥者不可發汗。○咽中閉塞不可發汗。發汗則吐血。氣欲絕。○身重心悸者不可發汗。○瘡家雖身痛不可發汗。發汗則瘡。○欬而小便利。若失小便者不可發汗。汗出則四肢厥逆冷。○諸動氣不可發汗。動氣義詳後論下。

仲景曰病人手足厥冷脉乍緊者邪結在胸中心中滿而煩饑不能食者病在胸中當吐之宜瓜蒂散○病人手足厥冷脉乍結以客氣在胸中心下滿而煩飲食不能入者病在胸中當吐之

曰病如桂枝證頭不痛項不强寸脉微浮胸中痞鞭氣上衝咽喉不得息者此爲胸有寒也當吐之宜瓜蒂散○少陰病飲食入口則吐心中溫溫欲吐復不能吐始得之手足寒脉弦遲者此胸中實不可下也當吐之若膈上有寒飲乾嘔者不可吐也急溫之宜四逆湯○按此二節前節言胸有寒者謂



寒邪也。所以當吐。後節言膈上有寒飲乾嘔者。謂中寒也。所以宜溫。然則前節之言寒者。言寒邪之實。後節之言寒者。言胃氣之虛。均謂之寒。而有虛實之異。實者宜吐。吐則散也。虛而吐之。則胃氣愈虛。病必更甚矣。此等要處。最當詳察。

日病胸上諸實。胸中鬱鬱而痛。不能食。欲使人按之。而反有涎唾。下利日十餘行。其脉反遲。而寸脉微滑。此可吐之。吐之利則止。

日太陽病吐之。但太陽病當惡寒。今反不惡寒。不欲近衣者。此爲吐之內煩也。○按此以太陽證有不常吐而吐者。必邪熱

乘虛入胃故致內煩也

一宿食在上脘者當吐之

一凡用吐藥中病卽止不必盡劑也

一寸脉弱而無力者切忌用吐

論下十六

論曰三陰皆受病已入於府者可下而已○此詳義見前六經

證

日脉浮而大心下反鞭有熱屬藏者攻之不令發汗○按此以

心下鞭而熱在藏卽脉雖浮大者病亦屬裏故不宜發汗而

當攻內也

曰傷寒不大便六七日頭痛有熱者與承氣湯○按此以陽明內熱而爲頭痛也故可攻之

曰陽明病外已解而潮熱者可攻裏也手足濇然而汗出者此大便已鞕也大承氣湯主之若汗雖多而微發熱惡寒者表未解也其熱不潮未可與承氣

曰陽明病胃中有燥屎者可攻之病人不大便五六日繞臍痛煩躁發作有時者此有燥屎也

曰汗出譫語者以有燥屎在胃中此爲風也須下之宜大承氣

湯

曰陽明病發熱汗多者熱在裏也急下之宜大承氣湯

曰陽明病發汗不解腹滿痛者邪在裏也急下之宜大承氣湯  
曰病腹中滿痛者此爲實也當下之

曰腹滿不減減不足言當下之宜大承氣湯

曰傷寒六七日結胸熱實脉沉而緊心下痛按之石韌者或心  
下至少腹韌滿而痛不可近者大陷胸湯主之

曰陽明少陽合病脉滑而數者有宿食也當下之宜大承氣湯  
○按此一條必須兼脉證而察之蓋傷寒之脉滑數者多若



無脹痛等證未必即爲宿食故不可單據滑數之脉便認作  
可攻之證

曰若表已解而內不消非大滿猶生寒熱則病不除也○按此  
一條言若非大滿而猶生寒熱者是表病猶不除也尚不可

下

曰若表已解而內不消大滿大實堅有燥屎自可除下之雖四  
五日不能爲禍也若不宜下而使攻之內虛熱入協熱遂利  
煩躁諸變不可勝數輕者因篤重者必死矣○按此一條言  
外無表證內有堅滿然後可下正以見下不宜輕輕下者爲

禍不小也

曰太陽病熱結膀胱其人如狂血自下下者愈若表未解者不可攻當先解表表已解但少腹急結者乃可攻之宜桃仁承氣湯

一凡傷寒當下者不宜用丸藥以丸藥不能滌蕩熱邪而但能損正氣也○又凡治傷寒熱邪傳裏者服下藥後仍用鹽炒麩皮一升許將絹包於病人腹上款款熨之使藥氣得熱則行大便必易通也

一脈有忌下者如傷寒論曰傷寒脈微而惡寒者此陰陽俱虛

一不可更發汗更吐更下也○寸口脉浮大而醫反下之此爲  
大逆○關脉弱胃氣虛有熱不可大攻之熱去則寒起○尺  
脉瀋弱無力者不可下○大便鞭者當下之設脉遲緩者不  
可下裏氣不實也○脉虛細者不可下○脉浮者不可下○  
脉濡而弱弱反在關濡反在巔弦反在上微反在下弦爲陽  
運微爲陰寒上實下虛意欲得溘微弦爲虛虛者不宜下也  
○脉浮而大浮爲氣實大爲血虛血虛爲無陰孤陽獨下陰  
部者醫以爲熱而復用毒藥攻其胃此爲重虛客陽去有期  
必下如汚泥而死○脉濡而緊濡則陽氣微緊則榮中寒陽

微衛中風發熱而惡寒榮緊胃氣冷微嘔心內煩醫謂有大  
熱解肌而發汗也陽虛煩躁心下苦痞堅表裏俱虛竭卒起  
而頭眩客熱在皮膚悵快不得眠不知胃氣冷緊寒在關元  
當溫反下之安可復追還○脉久數者非外邪也不可下之  
○脉細數者非實邪也不可下○結胸證其脉浮大者邪未  
入府也不可下下之則死○大抵傷寒最宜慎下若脉息無  
力及表證未罷者不可亂投湯劑下之爲逆

一證有忌下者如太陽病外證未解不可下下之爲逆○太陽  
與陽明合病喘而胸滿者邪在表也不可下○陽明病若微



發熱惡寒者表未解也。不可下。○陽明病潮熱大便初鞅後溇者不可攻。○陽明病腹微滿初頭鞅後必溇者非實熱也。不可攻之。○陽明病其熱不潮者未可與承氣湯。○陽明病雖有潮熱而大便不鞅者不可與承氣湯。○不轉失氣者其內不堅慎不可攻也。○陽明病心下鞅滿者不可攻。攻之利遂不止者死。鞅在心下者其邪在胸膈猶未入府也。故不可攻。○藏結無陽證不往來寒熱其人反靜舌上胎滑者不可攻也。○病欲吐者不可下。嘔多雖有陽明證不可攻之。此嘔多者病在上焦病在上而攻其下取敗之道也。○陽明病若

汗多微發熱惡寒者外未解也其熱不潮未可與承氣湯○  
濕家下之額上汗出微喘小便不利者死下利不止亦死○  
陽明病不能食攻其熱必噦所以然者胃中虛冷故也以其  
人本虛故攻其熱必噦○陰強無陽者雖其大便堅鞭亦不  
可下下之則清穀腹滿○陰陽俱虛惡水者若下之則裏冷  
不嗜食大便完穀出○陽微者不可下下之則心下痞鞭○  
惡寒者不可下○小便清利者火不盛也不可下○諸四逆  
厥者不可下○咽中閉塞者不可下○發汗多亡陽譫語者  
不可下○諸虛者不可下下之則陽虛而生寒仲景曰極寒

反汗出身必冷如水其有眼睛不慧語言不休口雖欲言舌  
不得前者皆死○陰虛水虧虛煩虛躁者不可下重亾其陰  
萬無生理矣

○看目 十七

凡治傷寒須觀兩目或赤或黃赤者爲陽證若兼六脈洪大有  
力或躁而渴者其熱必甚輕則三黃石膏湯重則大承氣之類  
主之

一凡目色清白而無昏冒閃爍之意者多非火證不可輕用寒

涼

一眼眇多結者必因有火蓋凡有火之候目必多液液乾而凝所以爲眇卽如肺熱甚則鼻涕出是亦目液之類也

一目睛上視者謂之戴眼此屬足太陽經之證蓋太陽爲目之上綱而與少陰爲表裏少陰之腎氣大虧則太陽之陰虛血少故其筋脉燥急牽引而上若直視不轉者尤爲凶候欲治此者速當以培陰養血爲主令人不知皆云爲風若用風藥則陰愈虛血愈燥矣其有不顛覆者未之有也

〇〇 舌色辨 十八

舌爲心之官本紅而澤凡傷寒三四日已後舌上有胎必自潤



而燥。自滑而瀉。由白而黃。由黃而黑。甚至焦乾。或生芒刺。是皆邪熱內傳。由淺入深之證也。故凡邪氣在表。舌則無胎。及其傳裏。則津液乾燥。而舌胎生矣。若邪猶未深。其在半表半裏之間。或邪氣客於胸中者。其胎不黑不澁。止宜小柴胡之屬以和之。若陽邪傳裏。胃中有熱。則舌胎不滑而澁。宜梔子豉湯之屬以清之。若煩躁欲飲水數升者。白虎加人參湯之類主之。大都舌上黃胎而焦澁者。胃府有邪熱也。或清之。或微下之。金匱要畧曰。舌黃未下者下之。黃自去。然必大便燥實。脉沉有力。而大渴者。方可下之。若微渴而脉不實。便不堅。胎不乾燥。芒刺者。不可

下也。其有舌上黑胎而生芒刺者，則熱更深矣。宜涼膈散，承氣湯。大柴胡之屬，酌宜下之。若胎色雖黑滑而不澀者，便非實邪，亦非火證。非惟不可下，且不可清也。此辨舌之槩。雖云若此，然猶有不可槩論者，仍宜詳察如左。

按傷寒諸書，皆云心為君主之官，開竅於舌，心主火，腎主水，黑為水色，而見於心部，是為鬼賊相刑，故知必死。此雖據理之談，然實有未必然者。夫五行相制，難免無尅。此其所以為病，豈因尅為病，便為必死。第當察其根本何如也。如黑色連地而灰黯無神，此其本原已敗，死無疑矣。若舌心焦黑而質地。

紅活未必皆為死證。陽實者清其胃火。火退自愈。何慮之有。其有元氣大損而陰邪獨見者。其色亦黃黑。真水涸竭者。其舌亦乾焦。此腎中水火俱虧。原非實熱之證。欲辨此者。但察其形氣。脈色自有虛實可辨。而從補從清。反如冰炭矣。故凡以焦黑乾澀者。尚有非實非火之證。再若青黑少神而潤滑不燥者。則無非水乘火位。虛寒證也。若認此為火而苦寒一投。則餘燼隨滅矣。故凡見此者。但當詳求脈證。以虛實為主。不可因其焦黑而執言清火也。傷寒固爾。諸證亦然。

新按

余在燕都嘗治一王生。患陰虛傷寒。年出三旬。而舌黑。

之甚其甚刺乾裂焦黑如炭身熱便結大渴喜冷而脉則無力神則昏沉羣醫謂陽證陰脉必死無疑余察其形氣未脫遂以耳溫壯水等藥大劑進之以救其本仍間用凉水以滋其標蓋水爲天一之精涼能解熱其可助陰非若苦寒傷氣者之比故於津液乾燥陰虛便結而熱渴火盛之證亦所不忌由是水藥並進前後凡用人參熟地輩各一二斤附子肉桂各數兩冷水亦一二斗然後諸證漸退飲食漸進神氣俱復矣但察其舌黑則分毫不減余甚疑之莫得其解再後數日忽舌上脫一黑殼而內則新肉燦然始知其膚腠焦枯死



而復活使非大爲滋補安望再生若此一證特舉其甚者紀之此外凡舌黑用補而得以保全者蓋不可枚舉矣所以凡診傷寒者當以舌色辨表裏以舌色辨寒熱皆不可不知也若以舌色辨虛實則不能無誤蓋實固能黑以火盛而焦也虛亦能黑以水虧而枯也若以舌黃舌黑悉認爲實熱則陰虛之證萬無一生矣

古按 金鏡錄曰舌見全黑色水尅火明矣患此者百無一治治者審之○薛立齋曰余在留都時地官王事鄭汝東妹婿患傷寒得此舌院內醫士曾禧曰當用附子理中湯人咸驚

駭而止及其困甚治棺曾與其鄰復往視之謂用前藥猶有  
生意其家既待以死拚而從之數劑而愈大抵舌黑之證有  
火極似水者卽柱學士所謂薪爲黑炭之意也宜涼膈散之  
類以瀉其陽有水來尅火者卽曾醫士所療者是也宜理中  
湯以消陰翳又須以老生薑切平搽其舌色稍退者可治堅  
不退者不可治

又按弘治辛酉金臺姜夔輝患傷寒亦得此舌手足厥冷  
吃逆不止衆醫猶作火治幾致危殆判院吳仁齋用附子理  
中湯而愈夫醫之爲道有是病必用是藥附子療寒其效可

數奈何世皆以爲必不可用之藥寧視人之死而不救不亦  
哀哉凡用藥得宜效應不異不可便謂爲百無一治而棄之  
也

飲水 十九

凡傷寒欲飲水因內水消竭欲得外水自救若大渴欲飲一升  
止可與一碗常令不足不可太過若恣飲過量使水停心下則  
爲水結胸留於胃則爲噎爲噦溢於皮膚則爲腫蓄於下焦則  
爲癰滲於腸間則爲利下皆飲水太多之過也又不可不與又  
不可強與故曰若還不與非其治強飲須教別病生也

凡陽明病、口燥但欲漱水而不欲嚥者、以熱在經而裏無熱也、必將爲衄、不可與涼藥。

按飲水一證、本以內熱極而陽毒甚者、最其相宜、若似乎止宜實邪、不宜於虛邪也、而不知虛證亦有不同、如陽虛無火者、其不宜水無待言也、其有陰虛火盛者、元氣既弱、精血又枯、多見舌裂唇焦、大渴喜冷、二焦如焚、二便閉結等證、使非藉天一之精、何以濟然眉之急、故先宜以冰水解其標、而繼以甘溫培其本、水藥兼進、無不可也、其有內真寒、外假熱、陰盛格陽等證、察其元氣、則非用甘溫、必不足以挽回、察其喉舌、



則些微辛熱又不可以近口。有如是者，則但將其溫大補之劑，或單用人參煎成湯液，用水浸極冷而飲之。此以假冷之味解上焦之假熱，而真溫之性復下焦之真陽。是非用水而實亦用水之意。余用此活人多矣。誠妙之甚者也。惟是假熱之證，則證雖熱而脈則微，口雖渴而便則不閉者，此而欲水必不可與。若誤犯之，則其敗泄元陽爲害不小。有不可不慎也。

〇〇三陽陰證辨 二十

足太陽膀胱經病，凡發熱、頭痛、腰脊強、肩背痛、脈浮緊者，是皆

太陽證也。若肩背畏寒、惡心欲嘔、或眼目無神、不欲見人、喜暗畏明、眼眵酸澁、或喜向壁臥、或戴眼上視、或頭傾身痛甚、或頰色清白、隱見青黑、或丹田無力、息短聲微、氣促而喘、或咽中閉塞、或角弓發痙、或小便清白、或失小便、或小便短赤、而內不喜冷、凡脉見浮空無力、或沉緊細弱者、皆太陽合少陰之陰證也。

○足陽明胃經之病。凡發熱、頭目痛、不得眠、脉長而數者、本皆陽明證也。若面鼻惡寒、面色青白、或鼻尖冷、口氣不熱、或唇口青白微黑、或氣短聲微、鼻息不長、懶於言語、或戴陽面赤、昏沉困倦多眠、或煩躁面赤、身熱虛狂、假斑、脉反微細無力、或身雖

發熱反欲得衣或口渴不欲飲水并水漿不入或惡寒寒慄惡  
心嘔逆或肉瞤心悸或動氣見於胸腹或四肢無力身重懶於  
舉動或手足自冷或肌肉之間以手按之殊無大熱或大便不  
實自利腹痛凡脉見浮長無力或短細結促者皆陽明合太陰  
之陰證也○足少陽膽經之病凡發熱頭耳牽痛脇肋痛往來  
寒熱脉見弦數者本皆少陽證也若身雖微熱而時作時止時  
多畏寒或耳聾或頭運或眼目羞澁或多驚怯恐畏或嘔苦吐  
酸或惡心喜煖或爪青筋急囊縮或厥逆下利腸鳴小腹痛凡  
脉見弦數無力而沉細微弱者皆少陽合厥陰之陰證也○以

上乃三陽經之陰證、陰證者卽陽虛之證也、皆大忌寒涼剋伐之藥、妄用卽死、余恐將來復有如李子建之流者、故特揭而用之、用爲提醒後人之鑑云、

○再論陰證陽證及李子建傷寒十勸之害 二十一

天地間死生消長之道、惟陰陽一氣盡之、而人力挽回之權、亦惟陰陽二字盡之、至於傷寒一證、則尤切於此、不可忽也、第傷寒之陰證陽證、其義有二、所謂二者、曰經有陰陽、證有陰陽也、經有陰陽、則三陽爲陽證、三陰爲陰證、證有陰陽、則實熱爲陽證、虛寒爲陰證、凡經之陰陽、則有寒有熱、故陽經亦有陰證、陰



經亦有陽證證之陰陽則有假有真故發熱亦有陰證厥逆亦有陽證此經自經而證自證乃傷寒中最要之綱領不可混也而今之醫流多不明此故每致混指陰陽肆行剋伐殺人於反掌之間而終身不悟深爲可慨原其由然非無所本蓋本於李子建之傷寒十勸十勸之中惟八勸曰病已在裏不可發汗九勸曰飲水不可過多十勸曰病後當忌飲食房勞凡此三者皆爲得理然亦人皆知之無待其爲勸矣此外七勸則悉忌溫補如一勸云傷寒頭痛及身熱便是陽證不可服熱藥若此一說乃悉以陽經之表病認爲內熱之陽證治以寒涼必殺人矣觀

仲景治太陽經傷寒頭痛發熱無汗者用麻黃湯頭痛發熱汗  
出惡風者用桂枝湯太陽病發熱頭痛脉反沉身體疼痛者當  
救其裏用四逆湯陽明病脉浮無汗而喘者出汗則愈宜麻黃  
湯凡此之類豈非皆用熱藥以治陽經之頭疼發熱乎且凡寒  
邪之感人必先入三陽之表所以爲頭疼發熱等證使於此時  
能用溫散則淺而且易故岐伯曰發表不遠熱是誠神聖傳心  
之旨惟仲景知之故能用溫散如此是豈果陽經之病便是陽  
證耶經證不明而戒用溫熱最妄之談此其一也又一勸曰傷  
寒必須直攻毒氣不可補益若據此說則凡是傷寒盡皆實證

而必無虛證矣。何岐伯曰：邪之所湊，其氣必虛。又曰：寒則真氣去，去則虛。虛則寒搏於皮膚之間。又觀仲景論傷寒之虛證，虛脈及不可汗吐下者，凡百十餘條。此外如東垣丹溪陶節菴輩所用補中益氣回陽返本溫經益元等陽則其宜否。溫補槩可知矣。矧今之人，凡以勞倦七情色慾過度及天稟薄弱之流，十居七八，使以此輩一旦因虛感邪，若但知直攻毒氣而不顧元陽，則寇未逐而主先傷，鼠未投而器先破，顧可直攻無忌乎。比受斯害死者多矣。妄談之甚，此其二也。又三勸曰：傷寒不思飲食，不可服溫脾胃藥。據此一說，則凡見傷寒不食者，皆是實熱。

證而何以仲景有曰陽明病不能食攻其熱必噦所以然者胃中虛冷故也又曰病人脈數數爲熱當消穀引飲而反吐者以其發汗令陽氣微膈氣虛脈乃數也數爲客熱不能消穀以胃中虛冷故也又曰食穀欲嘔者屬陽明也吳茱萸湯主之若此之類豈非皆寒證之宜溫者耶但傷寒之熱證固不能食而寒證之不食者尤多以中寒而不溫脾則元陽必脫而死矣此妄談之三也又四勸曰傷寒腹痛亦有熱證不可輕服溫煖藥據所云亦有熱證則寒證居多矣寒痛旣多則何不曰不可輕服寒涼藥而特以溫煖爲禁者何也獨不見仲景之治腹痛有用



真武湯者有用通脉四逆湯者有用四逆散加附子者有曰手足厥冷小腹滿按之痛者此冷結膀胱關元也使以此證而亦忌溫煖則寒在陰分能無斃乎此妄談之四也再加五勸之傷寒自利不可例服補藥煖藥止瀉藥六勸之禁用艾火七勸之手足厥冷不可例作陰證等說總屬禁熱之談余亦不屑與之多辨第拓取聖賢成法明哲格言再悉於此用救將來是誠今日之急務也因詳考仲景傷寒論見其所列三百九十七法而脉證之虛寒者一百有餘一百一十三方而用人參者二十用桂附者五十有餘又東垣曰實火宜瀉虛火宜補又薛立齋曰

大凡元氣虛弱而發熱者皆內真寒而外假熱也。凡若此者豈皆余之杜撰耶？豈子建諸人一無所見耶？若無所見胡可妄言。若有所見胡敢妄言。今觀彼十勸之中凡禁用溫補者居其八九而絕無一言戒及寒涼果何意哉。因致末學認爲聖經遂悉以陰證作陽證悉以虛證作實證。但知涼瀉之一長盡忘虛寒之大害。夫生民元氣足者其幾能堪此潛消暗剝之大盜乎。嗟嗟何物匪才敢言十勸。既不能蒐羅訓典明析陰陽又不能揣摩實虛原終要始總弗求陽德之亨全不識冰霜之至。後學者多被所愚致造終身之孽無辜者陰受其戮詎思冤魄可憐。余

言及此能不轉慈悲爲憤怒借筆削爲箴規獨思深詆先輩豈  
出本心亦以目擊多艱難勝嗚咽實亦有爲而云然蓋以久感  
之餘復有所觸適一契姻向以中年過勞因患勞倦發熱余爲  
速救其本已將復元忽遭子建之徒堅執十勸以相抗昧者見  
其發熱反爲左袒不數劑而遂以有生之徒置之死地因并徃  
日見聞倍加傷慘誠可痛可恨也子建子建吾知多窳之積於  
爾者久矣故悉此論以解爾此後之寃孽爾若有知尚知感否

論傷寒古治法 二十二

凡傷寒治法必當先知經絡次序如一日在太陽則爲發熱頭

痛等證三日在陽明則爲目痛鼻乾不眠等證三日在少陽則爲耳聾脇痛寒熱口苦等證四日在太陰則爲腹滿自利等證五日在少陰則爲舌乾口燥等證六日在厥陰則爲煩滿囊縮等證此傷寒傳經之大槩也然病有不同證有多變故不可以一定之法鑿鑿爲拘今人有不知察變者每按日按經執方求治則證多不合益見其難矣卽如發熱無汗頭痛者宜於發汗本太陽經之證治也然仲景曰陽明病外證云何曰身熱汗自出不惡寒反惡熱此陽明之發熱也曰陽明病反無汗而小便利嘔而欬手足厥者必苦頭痛此陽明之無汗頭痛也曰傷寒



脉弦細、頭痛發熱者、屬少陽、此少陽之頭痛發熱也、凡三陽皆爲表證、而惟少陽則曰半表半裏、不可發汗、然法曰、尺寸俱浮者、太陽受病也、尺寸俱長者、陽明受病也、尺寸俱弦者、少陽受病也、此三經皆受病、未入於府者、可汗而已、豈非少陽亦所當汗乎、此三陽之治、宜乎若此、至於三陰、則亦有若此者、如曰太陰病、脉浮者、可發汗、宜桂枝湯、曰少陰病、始得之、反發熱、脉沉者、宜麻黃附子細辛湯、曰厥陰證、下利、腹脹滿、身體疼痛者、先溫其裏、乃攻其表、溫裏四逆湯、攻表桂枝湯、凡此皆三陰之發熱、三陰之當汗者也、至於下證、則惟獨少陽爲半表半裏之經、

若下之、恐邪氣乘虛內陷、故不可攻、其他五經、皆有下證、由此觀之、則三陽何嘗無裏證、三陰何嘗無表證、故善治者、但見表邪未解、卽當解表、若表證未解、不可攻裏也、但見裏證已具、卽當攻裏、若裏證未實、尚宜和解也、或汗、或和、或下、但當隨證緩急、而用得其宜、卽古今畫一之法也。

論古法通變 二十三

凡用藥處方、最宜通變、不可執滯、觀仲景以麻黃湯治太陽經發熱頭痛、脈浮無汗之傷寒、而陽明病脈浮無汗而喘者、亦用之、太陽與陽明合病、喘而胸滿者、亦用之、此麻黃湯之通變也。

又如桂枝湯本治太陽經發熱汗出之中風而陽明病如瘧狀  
日晡發熱脉浮虛宜發汗者亦用之太陽病外證未解脉浮弱  
當以汗解者亦用之太陰病脉浮可發汗者亦用之厥陰證下  
利腹脹滿身疼痛宜攻表者亦用之此桂枝湯之通變也又如  
小柴胡湯本治少陽經脇痛乾嘔往來寒熱之傷寒而陽明病  
潮熱胸脇滿者亦用之陽明中風脉弦浮大腹滿脇痛不得汗  
身面悉黃潮熱等證亦用之婦人中風續得寒熱經水適斷熱  
入血室如瘧狀者亦用之此小柴胡之通變也由此觀之可見  
仲景之意初未嘗逐經執方而立方之意多有言不能悉者正

神不可以言傳也。所以有此法，未必有此證。有此證，未必有此方。即仲景再生，而欲盡踵其成法，吾知其未必皆相合。即仲景復言，而欲盡吐其新方，吾知其未必無短長。於戲，方烏足以盡變變。胡可以定方，但使學者能會仲景之意，則亦今之仲景也。又何必以仲景之方爲拘泥哉。余故曰：用藥處方，最宜通變，不當執滯也。雖然，此通變二字，蓋爲不能通變者設，而不知斯道之理，又自有一定不易之要焉。苟不知要，而強借通變爲譚柄，則胡猜亂道，妄識經權，反大失通變之旨矣。

△麻黃桂枝辨

二十四



按傷寒論曰太陽病頭痛發熱惡寒體痛嘔逆脈陰陽俱緊無汗而喘者名爲傷寒麻黃湯主之○曰太陽病頭痛發熱汗出惡風脈緩者名爲中風桂枝湯主之此以無汗脈緊者爲傷寒故用麻黃湯有汗脈緩者爲中風故用桂枝湯是其辨也又論曰桂枝本爲解肌若其人脈浮緊發熱汗不出者不可與也常須識此勿令誤也然何以又曰太陽病外證未解脈浮弱者當以汗解宜桂枝湯陽明病日晡所發熱脈虛浮者宜發汗發汗宜桂枝湯是豈桂枝爲止汗者耶但麻黃湯無芍藥而用麻黃桂枝湯無麻黃而用芍藥蓋桂枝性散芍藥性斂以芍藥從桂

枝則桂枝不峻以桂枝從芍藥則芍藥不寒然以芍藥之儒終不勝桂枝之勇且芍藥能滋調營氣適足爲桂枝取汗之助故桂枝湯亦是散劑但麻黃湯峻而桂枝湯緩耳故凡寒邪深固者恐服桂枝不能解表則反以助熱所以脉緊無汗者宜麻黃不宜桂枝若脉浮緩有汗或浮弱者以其風邪尚淺宜桂枝不宜麻黃也此麻黃湯爲發表之第一而桂枝湯則解表之次者也今時醫不能察此但聞汗不出者不可與桂枝便謂桂枝能止汗誤亦甚矣而不知止汗在芍藥不在桂枝也但桂枝性溫能強衛氣如內經曰陰氣有餘爲多汗身寒仲景曰極寒反汗

出者此亾陽而汗也。助陽乃可以止汗。則正宜用桂枝矣。○又傷寒論以太陽病無汗脉緊者爲傷寒。汗出脉緩者爲中風。此風寒之辨也。然大青龍湯證治曰。太陽中風脉浮緊發熱惡寒身疼痛。不汗出而煩躁者。大青龍湯主之。是豈非太陽中風亦有脉緊無汗者耶。可見風之與寒本不相遠。但風邪淺而寒邪深耳。淺屬陽而深屬陰耳。且近見外感寒邪者。率皆傷寒發熱脉緊無汗等證。至於中風一證。謂其脉緩有汗而復發熱者。其病本不多見。卽有之亦必外因者少而內因者多也。倘學者以風寒二字及麻黃桂枝二湯必欲分其陰陽同異而執以爲辭。

則失之遠矣。本門前卷有風寒辨，宜并察之。

○論今時皆合病併病 二十五

余究心傷寒已久，初見合病併病之說，殊有不明。而今始悉之。夫所謂合病者，乃二陽三陽同病，病之相合者也。併病者，如太陽先病不解，又併入陽明少陽之類也。觀仲景曰：二陽併病，太陽初得病時，發其汗，汗先出不徹，因轉屬陽明。若太陽病證不罷者，不可下。按此云轉屬陽明，則自太陽而來可知也。云太陽病證不罷，則二經皆病可知也。凡併病者，由淺而深，由此而彼，勢使之必然也。此合病併病之義，而不知者，皆以此爲罕見之



證又豈知今時之病則皆合病併病耳何以見之蓋自余臨證以來凡診傷寒初未見有單經挨次相傳者亦未見有表證悉罷止存裏證者若欲依經如式求證則未見有如式之病而方治可相符者所以令人致疑愈難下手是不知合病併病之義耳今列其大畧如左

一合病者乃兩經三經同病也如初起發熱惡寒頭痛者此太陽之證而更兼不眠卽太陽陽明合病也若兼嘔惡卽太陽少陽合病也○若發熱不眠嘔惡者卽陽明少陽合病也○

若三者俱全便是三陽合病三陽合病者其病必甚

一三陽與三陰本無合病蓋三陽爲表三陰爲裏若表裏同病卽兩感也故凡有陰陽俱病者必以漸相傳而至皆併病耳此亦勢所必至非合病兩感之謂

一併病與合病不同合病者彼此齊病也併病者一經先病然後漸及他經而皆病也如太陽先病發熱頭痛而後見目痛鼻乾不眠等證者此太陽併於陽明也或後見耳聾脇痛嘔而口苦等證者此太陽併於少陽也或後見腹滿噎乾等證者此太陽併於太陰也或後見舌乾口燥等證者此太陽併於少陰也或後見煩滿囊縮等證者此太陽併於厥陰也若

陽明併於三陰者、必鼻乾不眠、而兼三陰之證、少陽併於三陰者、必耳聾嘔苦、而兼三陰之證、陰證雖見於裏、而陽證仍留於表、故謂之併、凡患傷寒、而始終熱有不退者、皆表邪之未解耳、但得正汗一透、則表裏皆愈、豈非陰陽相併之病乎、今之傷寒、率多併病、若明此理、則自有頭緒矣、治此之法、凡併病在三陽者、自當解三陽之表、如邪在太陽者、當知爲陽中之表、治宜輕清、邪在陽明者、當知爲陽中之裏、治宜厚重、邪在少陽者、當知爲陽中之樞、治宜和解、此雖解表之大法、然余仍有心法、詳載新方八畧中、故或宜溫散、或宜涼散、或

宜平散或宜補中而散是又於陰陽交錯之理有不可不參  
合而酌用者皆治表之法也至於病入三陰本爲在裏如太  
陰爲陰中之陽治宜微溫少陰爲陰中之樞治宜半溫厥陰  
爲陰中之陰治宜大溫此陰證之治畧也然病雖在陰而有  
兼三陽之併病者或其邪熱已甚則自宜清火或其表尚未  
解則仍當散邪蓋邪自外入則外爲病本拔去其本則裏病  
自無不愈者此所以解表卽能和中也若表邪不甚而裏證  
爲急又當先救其裏蓋表裏之氣本自相關惟表不解所以  
裏病日增惟裏不和所以表邪不散此所以治裏亦能解表



也。但宜表宜裏，或此或彼之間，則自有緩急先後，一定不易之道，而非可以疑似出入者。要在乎知病之藪，而獨見其必勝之機耳。此又陰陽併病之治畧也。惟是病既在陰，必關於藏，藏氣爲人之根本，而死生係之。故凡診陰證者，必當細察其虛實，而補瀉寒熱，弗至倒施，則今時之治要，莫切乎此矣。

○治法 二十六

凡治傷寒，不必拘於日數，但見表證，卽當治表；但見裏證，卽當治裏。因證辨經，隨經施治，乃爲良法。若表邪未解，卽日數雖多，但有表證，而脉見緊數者，仍當解散，不可攻裏也。若表邪已輕，

卽日數雖少、但有裏證、而脉見沉實者、卽當攻裏、不可發表也。  
然此二者、一曰發表、一曰攻裏、皆以邪實者爲言也。其有脉氣  
不足、形氣不足者、則不可言發言攻、而當從乎補矣。但補有輕  
重、或宜兼補、或宜全補、則在乎明而慧者之用之、如法耳。

一傷寒、但見發熱惡寒、脉緊數、無汗、頭項痛、腰脊強、或肢體痠  
軟者、便是表證、不拘日數多寡、卽當解散。但於陰陽虛實、不  
可不預辨也。而於後開汗散方中、擇宜用之。

一傷寒、但見往來寒熱、脇痛、口苦而嘔、或漸覺耳聾、脉見弦數  
者、卽少陽經半表半裏之證、治宜和解。以新方諸柴胡飲、及

小柴胡湯之類酌宜用之。然少陽之治有三禁。曰不可汗吐下也。

傷寒如頭痛發熱惡寒表證之類悉除。反見怕熱躁渴譫語。揭去衣被。揚手擲足。斑黃發狂。或潮熱自汗。大便不通。小便短赤。或胸腹脹滿疼痛。或上氣喘促。脉實有力者。卽是傳裏之熱證。不拘日數多少。卽當清裏。如果實邪內結。不得宣通。此必大爲滌蕩。庶使裏通。而表亦通也。然必其胸腹脹滿。腸胃燥結。而大滿大實。堅者。乃可攻之。故法曰。痞滿燥實堅五者具而後可下。又曰。下不嫌遲。蓋恐內不實而誤攻之。則必

至不救矣

一凡治傷寒如時寒火衰內無熱邪而表不解者宜以辛溫熱劑散之時熱火盛而表不解者宜以辛甘涼劑散之時氣皆平而表不解者宜以辛甘平劑散之此解散之要法也蓋人在氣交之中隨氣而化天地之氣寒則宜辛熱天地之氣熱則宜辛涼經文既以冬爲傷寒春爲溫病夏爲暑病名旣因時而易則方亦不容不隨時而更也第以涼散之法當知所辨必其表裏俱有熱證方可兼用清涼若身表雖熱而內無熱證者此以表邪未解因寒而爲熱也不可妄用涼藥蓋恐



全書卷七  
傷寒  
表寒未除而內寒復至以寒遇寒則凝結不解必將愈甚經  
曰發表不遠熱正此之謂也且舍時從證尤爲治傷寒緊要  
之法此又不可不知常變

一凡暑熱盛行瘟疫大起焦渴斑黃藏府如火此則或用寒肅  
以清其裏或用寒散以救其表但當察表裏而酌緩急之宜  
也

〇〇論虛邪治法 二十七

凡傷寒治法在表者宜散在裏者宜攻此大則也然傷寒死生  
之機則全在虛實二字夫邪之所湊其氣必虛故傷寒爲患多

係乘虛而入者。時醫不察虛實。但見傷寒。則動曰傷寒。無補法。任意攻邪。殊不知可攻而愈者。原非虛證。正既不虛。邪自不能害之。及其經盡氣復。自然病退。故治之亦愈。不治亦愈。此實邪之無足慮也。惟是挾虛傷寒。則最爲可畏。使不知固本禦侮之策。而肆意攻邪。但施孤注。則凡攻散之劑。未有不先入於胃。而後達於經。邪氣未相及。而胃氣先被傷矣。卽不盡脫。能無更虛。元氣更虛。邪將更入。虛而再攻。不死何待。是以凡患傷寒而死。者必由元氣之先敗。此則舉世之通弊也。故凡臨證者。但見脈弱無神。耳聾手顫。神倦氣怯。畏寒喜暗。言語輕微。顏色青白。諸

形證不足等候便當思顧元氣若形氣本虛而過散其表必至  
 亡陽藏氣本虛而誤攻其內必至亡陰犯者必死即如元氣半  
 虛而邪方盛者亦當權其輕重而兼補以散庶得其宜若元氣  
 大虛則邪氣雖盛亦不可攻必當詳察陰陽峻補中氣如平居  
 偶感陰寒邪未深入但見發熱身痛脉數不洪內無火證素稟  
 不足者即當用理陰奠加柴胡或加麻黃連進一二服其效如  
 神此常用第一方也此外諸證如虛在陽分則當以四柴胡飲  
 補中益氣湯或入珍湯理中湯溫胃飲之類此溫中自能發散  
 之治也若虛在陰分而液涸水虧不能作汗則當用補陰益氣

煎三柴胡飲或三陰煎左歸飲之類此壯水制陽精化爲氣之  
治也若陰盛格陽真寒假熱者則當以大補元煎右歸飲崔氏  
八味丸料之類此引火歸原之治也其有陰盛陽衰之證身雖  
發熱而畏寒不已或嘔惡或泄瀉或背涼如水或手足厥冷是  
省陽虛之極必用大溫中飲或理陰煎不可疑也若果邪火熱  
甚而水枯乾涸者或用涼水漸解其熱表未解而固閉者或兼  
微解漸去其寒若邪實正虛原有主客不敵之勢使但能保定  
根本不令決裂則邪將不戰而自解此中大有玄妙余常藉此  
而存活者五十年來若干人矣謹書之以爲曾濟者之則



○補中亦能散表 二十八

夫補者所以補中何以亦能散表蓋陽虛者卽氣虛也氣虛於中安能達表非補其氣肌能解乎凡脉之微弱無力或兩寸短小而多寒者卽其證也此陽虛傷寒也陰虛者卽血虛也血虛於裏安能化液非補其精汗能生乎凡脉之浮芤不實或兩尺無根而多熱者卽其證也此陰虛傷寒也然補則補矣仍當酌其劑量譬之飲酒若能飲一勺而與以一升宜乎其至於困也使能飲一斗而與以一合其真蚍蜉之撼大樹耳

○寒中亦能散表

二十九

夫寒中者所以清火何以亦能散表蓋陽亢陰衰者卽水虧火盛也水涸於經安能作汗譬之乾鍋赤裂潤自何來但加以水則鬱蒸沛然而氣化四達夫汗自水生亦猶是也如前論言補陽補陰者宜助精氣也此論言以水濟火者宜用寒涼也蓋補者補中之不足濟者制火之有餘凡此者均能解表其功若一而宜寒宜煖其用不侔是有不可不辨

〇〇〇傷寒三表法

三十

傷寒者危病也治傷寒者難事也所以難者亦惟其理有不明而不得其要耳所謂要者亦惟正氣邪氣二者之辨而已使能

知正氣之虛實邪氣之淺深則盡之矣夫寒邪外感無非由表而入裏由表而入者亦必由表而出之故凡患傷寒者必須得汗而後解但正勝邪者邪入必淺此元氣之強者也邪勝正者其入必深此元氣之弱者也邪有淺深則表散有異正有虛實則攻補有異此三表之法所不容不道也何爲三表蓋邪淺者逐之於藩籬散在皮毛也漸深者逐之於戶牖散在筋骨也深入者逐之於堂室散在臟腑也故淺而實者宜直散直散者直逐之無難也虛而深者宜托散托散者但強其主而邪無不散也今姑舉其畧如麻黃湯桂枝湯參蘇飲羌活湯麻桂飲之類

皆單逐外邪肌表之散劑也又如小柴胡湯補中益氣湯三柴  
胡飲四柴胡飲之類皆兼顧邪正經絡之散劑也再如理陰煎  
大溫中飲六味回陽飲十全大補湯之類皆建中逐邪臟腑之  
散劑也嗚呼以散藥而散於肌表經絡者誰不知之惟散於臟  
腑則知者少矣以散爲散者誰不知之惟不散之散則立之又  
立矣余因古人之未及故特吐其散邪之精義有如此

傷寒無補法辨

三十一

按傷寒一證惟元氣虛者爲最重虛而不補何以挽回奈何近  
代醫流咸謂傷寒無補法此一言者古無是說而今之庸輩動



以爲言遂致老幼相傳確然深信其爲害也不可勝紀茲第以  
一歲之事言之如萬曆乙巳歲都下瘟疫盛行凡涉年衰及內  
傷不足者余卽用大溫大補兼散之劑得以全活者數十餘人  
使此輩不幸而遭庸手則萬無一免者矣卽余一人於一年之  
中所遇若此其如歲月之長海宇之廣凡爲無補所殺者顧可  
勝量哉余痛夫枉者之非命因徧求經傳則益無傷寒無補法  
之例必求其由則惟陶節菴有云傷寒汗吐下後不可使用參  
芪大補使邪氣得補而熱愈盛所謂治傷寒無補法也此一說  
者蓋亦本於孫真人之言云服承氣湯得痢瘥慎不中補也此

其意謂因攻而愈者本爲實邪故不宜妄用補藥復助其邪耳  
初非謂虛證亦不宜補也此外則有最庸最拙爲萬世之害者  
莫如李子建之傷寒十勸今後世謬傳實基於此故余於前論  
直叱其非并詳考仲景傷寒論及諸賢之成法以申明其義焉  
矧今人之患傷寒者惟勞倦內傷七情挾虛之類十居七八傳  
誦傷寒無補者十有八九以挾虛之七八當無補之八九果能  
堪乎而不知以直攻而死者皆挾虛之輩也此在衆人則以傳  
聞之訛無怪其生疑畏至若名列醫家而亦曰傷寒無補法何  
其庸妄無知毫不自反誤人非淺誠可醜可恨者也其有尤甚

者則本來無術偏能惑人但逢時病則必曰寒邪未散何可用  
補若將邪氣補在譬之關門趕賊若此一言又不知出自何典  
亂道異端尤可恨也此外又有一輩曰若據此脉證誠然虛矣  
本當從補但其邪氣未淨猶宜緩之姑俟清楚方可用也是豈  
知正不能復則邪必日深焉能清楚元陽不支則變生呼吸安  
可再遲此不知死活之流也又有一輩曰此本虛證如何不補  
速當用人參七八分但以青陳之類監制用之自然無害是豈  
知有補之名無補之實些須兒戲何濟安危而尚可以一消一  
補自掣其肘乎此不知輕重之徒也卽或有出奇言補者亦必

見勢在垂危然後曰快補快補夫馬到臨涯收韁已晚補而無  
濟必又曰傷寒用參者無不死是傷寒無補之說益堅而衆人  
之惑益不可破雖有儀秦不能辯也余日觀其受害於此者蓋  
不可勝紀矣心切悲之不得不辯夫傷寒之邪本皆自外而入  
而病有淺深輕重之不同者亦總由正氣之有強弱耳故凡正  
強者雖感亦輕以邪氣不能深入也主弱者雖輕必重以中虛  
不能自固也此其一表一裏邪正相爲勝負正勝則生邪勝則  
死倘以邪實正虛而不知固本將何以望其不敗乎矧治虛治  
實本自不同補以治虛非以治實何爲補任寒邪補以補中非



以補外何謂關門趕賊卽曰強寇登堂夫凡王弱者避之且不  
暇尚敢關門乎既能關門王尚強也賊聞王強必然退遁不遁  
卽成禽矣謂之捉賊又何不可夫病情人事理則相同未有正  
勝而邪不却者故王進一分則賊退一步謂之內托謂之逐邪  
又何不可而顧謂之關門耶矧如仲景之用小柴胡湯以人參  
柴胡並用東垣之用補中益氣湯以參朮升柴並用蓋一以散  
邪一以固本此自逐中有固固中有逐又豈皆補在關門之謂  
乎甚矣一言之害殺命無窮庸醫之庸莫此爲甚余不能以口  
徧傳故特爲此辯使有能廣余之說以活人一命者必勝念彌

陀經多多矣

徐東臯曰漢張仲景著傷寒論專以外傷爲法其中顧盼脾胃元氣之秘世醫鮮有知之者觀其少陽證小柴胡湯用人參則防邪氣之入三陰或恐脾胃稍虛邪乘而入必用人參甘草固脾胃以克中氣是外傷未嘗不內因也卽如理中湯附子湯黃連湯炙甘草湯吳茱萸湯茯苓四逆湯桂枝人參湯人參敗毒散人參白虎湯陽毒升麻湯大建中等湯未嘗不用參朮以治外感可見仲景公之立方神化莫測或者謂外傷是其所長而內傷非所知也此誠不知公者也何今世之醫不識元氣之旨

惟見王綸雜著戒用人參之謬說執泥不移樂用苦寒攻病之  
標致誤蒼生死於非命抑何限耶間有病家疑信相半兩弗之  
從但不速其死耳直以因循俟其元氣自盡終莫之救而斃者  
可謂知乎况斯世斯時人物劇繁稟氣益薄兼之勞役名利之  
場甚至蹈水火而不知恤耽酒色以竭其真不謂內傷元氣吾  
弗信也觀其雜病稍用攻擊而脾胃遂傷甚則絕穀而死者可  
以類推矣

病宜速治

三十二

凡人有感冒外邪者當不時卽治速爲調理若猶豫隱忍數日

乃說致使邪氣入深則難爲力矣惟小兒女子則爲尤甚凡傷寒之病皆自風寒得之邪氣在表未有溫覆而不消散者若待入裏必致延久一人不愈而親屬之切近者日就其氣氣從鼻入必將傳染此其病之微甚亦在乎治之遲早耳故凡作湯液不可避晨夜覺病須臾卽宜速治則易愈矣仲景曰凡發汗溫服湯藥其方雖言日三服若病劇不解當促之可半日中盡三服卽速治之意也其或藥病稍見不投但有所覺便可改易若其勢重當一日一夜晡時觀之一劑未退卽當復進一劑最難者不過三劑必當汗解其有汗不得出者卽凶候也



不與... 其... 不... 出... 曲...

一日... 一... 一... 一... 一... 一...

... 其... 其... 其... 其... 其... 其...

... 其... 其... 其... 其... 其... 其...

... 其... 其... 其... 其... 其... 其...

... 其... 其... 其... 其... 其... 其...

... 其... 其... 其... 其... 其... 其...

... 其... 其... 其... 其... 其... 其...

... 其... 其... 其... 其... 其... 其...

... 其... 其... 其... 其... 其... 其...

會稽 張介賓 會卿著

會稽 魯 超 謙菴訂

# 傷寒

下

溫病暑病

三十三

溫病暑病之作。本由冬時寒毒內藏。故至春發為溫病。至夏發為暑病。此以寒毒所化。故總謂之傷寒。仲景曰。發熱不惡寒。而渴者。溫病也。暑病則尤甚矣。蓋暑病者。即熱病也。是雖與寒證

不同。然亦因時而名。非謂其病必皆熱也。此外如夏月中暑者。亦謂之暑病。則又非寒毒蓄留之證。在仲景卽名之爲中暍。義詳暑證門。所當參閱。

一溫病暑病之治。宜從涼散。固其然也。然必表裏俱有熱證。方可治用清涼。若值四時寒邪客勝。感冒不正之氣。表邪未解。雖外熱如火。而內無熱證。可據者。不得以溫暑之名。執以爲熱。而槩用涼藥。

一冬有非時之煖。或君相客熱之令。而病熱者。名曰冬溫。此與冬月正傷寒大異。法宜涼解。此舍時從證也。若夏有寒者。其

宜溫亦然。

素問刺志論曰氣盛身寒得之傷寒氣虛身熱得之傷暑傷寒論曰脈盛身寒得之傷寒脈虛身熱得之傷暑此二論之言傷寒傷暑者非即溫病暑病之謂蓋單指夏月感觸時氣者所當辨其爲寒爲暑而寒則宜溫暑則宜清也身寒者言受寒憎寒身熱者言受熱發熱非曰身冷者方是傷寒身熱者乃是傷暑也但此二論則一曰氣盛氣虛一曰脈盛脈虛詞若異而理則一也故凡察氣者當在形色察脈者當在本元合而觀之則見理精矣



發斑 三十四

發斑證輕則如疹子重則如錦紋其致此之由雖分數種然總由寒毒不解而然如當汗不汗則表邪不解當下不下則裏邪不解當清不清則火盛不解當補不補則無力不解或下之太早則和陷不解或以陽證誤用溫補則陽亢不解或以陰證誤用寒涼則陰凝不解凡邪毒不解則直入陰分鬱而成熱乃致液涸血枯斑見肌表此實毒邪固結營衛俱劇之證也但斑有微甚勢有重輕輕者細如蚊迹或先紅而後黃重者成粒成片或先紅而後赤輕者只在四肢重者乃見胸腹輕者色淡而隱

重者色紫而顯若見黑斑或大便自利或短氣或一便不通則  
十死九矣凡病傷寒而汗下溫清俱不能解及足冷耳聾煩悶  
欬嘔者便是發斑之候

一或無已曰大熱則傷血熱不散裏實表虛熱邪乘虛出於皮  
膚而爲斑也慎不可發汗若汗之重令開泄更增斑爛也自  
後諸家所述皆同此說予則以爲不然蓋凡傷寒之邪本自  
外而入深入不解則又自內而出此其表裏相乘勢所必至  
原非表虛證也但使內外通達則邪必由表而解矣卽如犀  
角地黃湯乃治斑之要藥人知此湯但能涼血清毒而不知

此湯善於解表散邪若用之得宜則必通身大汗熱邪頓解  
何爲不可汗耶由此言之則凡脉數無汗表證具在者必須  
仍從解散

一凡治發斑須察表裏如瘟疫不解熱入血室舌焦煩熱發斑  
者犀角地黄湯○內外俱熱陽明狂躁大渴發斑者白虎湯  
或加人參○陽毒赤斑狂言見血者陽毒升麻湯○疫癘發  
斑大熱而燥者三黃石膏湯○火鬱於經寒邪不解脉仍滑  
數而發斑者一柴胡飲○陽明外邪陽毒不解者升麻湯○  
脾腎太虛小汗不聚

溫熱發斑者柴胡白虎煎○溫熱毒盛咽痛發斑者玄參升  
麻湯○陰虛水虧血熱發斑者玉女煎○陰虛血燥大熱大  
渴發斑者歸葛飲○內虛外實陰盛格陽發斑者大溫中飲  
○太陽陽明惡熱大便秘結邪毒在府發斑者調胃承氣湯  
一凡本非陽證妄用寒涼者每令人泄瀉邪陷不解予當用大  
溫中飲理陰煎之類解寒托邪始得大汗汗後邪達多有見  
赤斑風餅隨汗而出隨出隨沒頃刻卽愈活者多人矣凡寒  
毒爲斑卽此可見使內托無力則此毒終無出期日深日甚  
難乎免矣此理甚微不可不察



發黃 三十五

凡發黃黃疸等證多由濕熱如小水不利或黃或赤或小腹脹滿不痛或大便實而渴甚脉來沉實有力皆濕熱之證輕則茵陳五苓散重則茵陳湯分利小便清血瀉火則黃白退矣然黃有陰證及諸治法俱詳黃疸門宜參用之

仲景曰太陽病脉浮而動數頭痛發熱微盜汗出而反惡寒者表未解也醫反下之則爲結胸若不結胸但頭汗出小便不利身必發黃也○曰陽明病無汗小便不利心中懊懣者身

必發黃○陽明病發熱汗出者此爲熱越不能發黃也但頭

汗出身無汗際頸而還小便不利渴引水漿者此爲癰熱在裏身必發黃茵陳蒿湯主之○曰傷寒脈浮而緩手足自溫者繫在太陰身當發黃若小便自利者不能發黃至七八日大便鞭者爲陽明病也○曰傷寒發汗已身目爲黃所以然者以寒濕在裏不解故也以爲不可下也於寒濕中求之○傷寒身黃發熱者梔子蘗皮湯主之

孫真人曰黃疸脈浮者當以汗解之宜桂枝加黃耆湯。

△發狂 三十六

傷寒發狂本陽明實熱之病然復有如狂證者雖似狂而實非

狂此中虛實相反最宜詳辨不可忽也凡實熱之狂本屬陽明蓋陽明爲多氣多血之經陽邪傳入胃府熱結不解因而發狂內經陽明脉解篇曰胃者土也故聞木音而驚者土惡木也其惡火者熱甚則惡火也其惡人者以陽明厥則喘而惋惋則惡人也其病甚則棄衣而走登高而歌或數日不食或踰垣上屋者以四肢爲諸陽之本陽盛則四肢實實則能登高也其棄衣而走者以熱盛於身也其妄言罵詈不避親疎而歌者以陽盛爲邪也又曰陰不勝其陽則脉流薄疾并乃狂又曰邪入於陽則狂是皆以陽明熱邪上乘心肺故令神志昏亂若此此陽旺

也然傷寒病至發狂是爲邪熱已極使非峻逐火和則不能已故但察其大便鞭結或腹滿而堅有可攻之證則宜以大小承氣或涼膈散六一順氣湯之類下之可也如無脹滿實堅等證而惟胃火致然者則但以白虎湯抽薪飲之類泄去火邪其病自愈

一 如狂證本非實熱發狂其證亦有輕重如仲景曰太陽病不解熱結膀胱其人如狂其外不解者尚未可攻當先解外外已解但少腹急結者乃可攻之宜桃仁承氣湯○又曰太陽病六七日表證仍在脈微而沉反不結胸其人如狂者以熱



在下焦。少腹當鞭滿。小便自利者。下其血。乃愈。抵當湯主之。  
按此二條。以太陽熱邪不解。隨經入府。但未至發狂。故曰如  
狂。此以熱搏血分。畜聚下焦。故宜下也。

一近見傷寒家。則別有如狂之證。古人所未及言者。蓋或由失  
志而病。其病在心也。或由悲憂而病。其病在肺也。或由失精  
而病。其病在腎也。或由勞倦思慮而病。其病在肝脾也。此其  
本病已傷於內。而寒邪復感於外。則病必隨邪而起矣。其證  
如狂。亦所謂虛狂也。而虛狂之證。必外無黃赤之色。剛暴之  
氣。內無胸腹之結。滑實之脈。雖或不時躁擾。而禁之則止口。

多矣。誕而聲息不壯，或眼見虛空，或驚惶不定，察其上則口無焦渴，察其下則便無鞅結，是皆精氣受傷，神魂不守之證。此與陽極爲狂者，反如水炭而時醫不能察，但見錯亂，便謂陽狂，妄行攻瀉，必致殺人。凡治此者，須辨陰陽，其有虛而挾邪者，邪在陽分，則宜補中益氣湯之類；邪在陰分，則宜補陰益氣煎之類；虛而無邪者，在陽分，則宜四君八珍十全大補湯、大補元煎之類；在陰分，則宜四物六味左歸飲、一陰煎之類；陰虛挾火者，宜加減一陰煎、二陰煎之類；陽虛挾寒者，宜理中湯、回陽飲、八味湯、右歸飲之類。此方治之，宜大畧如此。

而變證之異則有言不能傳者能知意在言表則知所未言  
矣

一凡身有微熱或而赤戴陽或煩躁不寧欲坐臥於泥水中然  
脉則微弱無力此陰盛似陽也名爲陰躁蓋以陽虛於下則  
氣不歸原故浮散於上而發躁如狂速當溫補其下命門爰  
則火有所歸而病當自愈若醫不識此而誤用寒涼者必死  
發狂下利譫語者不治○狂言反目直視者爲醫絕死○汗  
出後輒復熱狂言不食者死

仲景論曰太陽病關節疼痛而煩脈沉而細者此名濕痺其人小便不利大便反快但當利其小便○曰濕家之爲病一身盡痛發熱身色如熏黃○濕家其人但頭汗出背強欲得被覆向火若下之早則噦胸滿小便不利舌上如胎者以丹田有熱胸中有寒渴欲得水而不能飲口燥煩也○濕家下之額上汗出微喘小便不利者死利下不止者亦死

論曰風濕相搏一身盡疼痛法當汗出而解值天陰雨不止醫云此可發汗汗之病不愈者何也曰發其汗汗大出者但風氣去濕氣在是故不愈也若治風濕者發其汗但微微似欲



汗出者風濕俱去也○濕家病身上疼痛發熱面黃而喘頭  
痛鼻塞而煩其脉大自能飲食腹中和無病病在頭中寒濕  
故鼻塞內藥鼻中則愈○病者一身盡疼發熱日晡所劇者  
此名風濕此病傷於汗出當風或久傷取冷所致也

論曰傷寒八九日風濕相搏身體疼煩不能自轉側不嘔不渴  
脉浮虛而澹者桂枝附子湯主之○若其人大便秘小便自  
利者桂枝湯去桂加白朮主之○風濕相搏骨節煩疼掣痛  
不得屈伸近之則痛劇汗出短氣小便不利惡風不欲去衣  
或身微腫者甘草附子湯主之

仲景曰病有結胸其狀何如荅曰按之痛寸脉浮關脉沉名曰結胸也○曰病發於陽而反下之熱入因作結胸病發於陰而反下之因作痞所以成結胸者以下之太早故也○曰結胸脉浮大者不可下下之即死○曰結胸證悉具煩躁者亦論曰太陽病脉浮而動數頭痛發熱微盜汗出而反惡寒者表未解也醫反下之胃中空虛陽氣內陷心下因鞭而爲結胸大陷胸湯主之○曰太陽病重發汗而復下之不大便五六

論死

日舌上燥而渴。日晡所小有潮熱。從心下至少腹。鞭滿而痛。不可近者。大陷胸湯主之。○按此二條。皆言太陽表證未解。因誤下之而成結胸也。

論曰。傷寒五六日。嘔而發熱者。此柴胡湯證。具而以他藥下之。其柴胡證仍在者。當復與柴胡湯。必蒸蒸而振。却發熱汗出而解。若心下滿而鞭痛者。此爲結胸也。大陷胸湯主之。但滿而不痛者。此爲痞。柴胡不中與之。宜半夏瀉心湯。○按此一條。以少陽表證未解。因誤下之而成結胸也。

論曰。太陽少陽併病。而反下之。成結胸。心下鞭下利不止。水漿

不入其人煩心。○按此一條以太陽少陽併病，一經表邪未解，亦因誤下而成結胸也。

論曰：陽明病，心下鞭滿者，不可攻之。攻之利遂不止者死。利止者愈。○按此一條謂陽明邪氣入府者，必腹滿便結，今惟心下鞭以邪氣尚淺，未全入府，故不可攻。此雖非結胸，而實亦結胸之類，蓋不由誤下，而因陽明之邪漸深也。

論曰：傷寒六七日，結胸，執實，脈沉而緊，心下痛，按之石鞭者，大陷胸湯主之。○按此一條不云下早，而云執實，其於六七日脈沉緊而心下鞭痛者，此傷寒傳裏之實邪，有不因誤下而



成結胸者乃傷寒之本病也

愚按結胸一證觀傷寒論所載如前數條凡太陽表邪未解而誤下者成結胸少陽證亦然太陽少陽併病者亦然此不當下而誤下之以致藏氣空虛外邪乘虛內陷結於胸膈之間是皆因下而結者也又曰傷寒六七日結胸熱實脉沉而緊心下痛按之石鞭者此不因下而邪實漸深結聚於胸者也然則結胸一證有因誤下而成者有不因下而由於本病者觀近代傷寒諸書云未經下者非結胸也豈不謬哉

一結胸證觀仲景所言惟太陽少陽二經誤下者有之而陽明

一經獨無言及者何也蓋凡病入陽明胃府已實故可下之而無害也然又曰陽明病心下鞭滿者不可攻之攻之利不止者死此豈非陽明在經表證邪未入府者亦爲不可下乎不惟三陽爲然卽三陰之證其有發熱惡寒表邪未解者切不可下最當慎也

結胸證治之辨凡心腹脹滿鞭痛而手不可近者方是結胸若但滿不痛者此爲痞滿非結胸也凡痞滿之證乃表邪傳至胸中未入於府此其將入未入猶兼乎表是卽半表半裏之證只宜以小柴胡之屬加枳壳之類治之或以本方對小

一陷胸湯亦妙。今余新方製有柴陳煎及一柴胡飲之類皆可  
擇而用之也。至於結胸之治則仲景俱用大陷胸湯。王之然  
以余之見則惟傷寒本病其有不因誤下而實邪傳裏心下  
鞭滿痛連小腹而不可近或燥渴譫妄大便鞭脉來沉實有  
力者此皆大陷胸湯所正宜也。其於太陽少陽表邪未解因  
下早而致結胸者此其表邪猶在若再用大陷胸湯是旣因  
誤下而復下之此則余所未敢不若以痞滿門諸法酌其輕  
重而從乎雙解以緩治之或外用罨法以解散胸中實邪此  
余之屢用獲效而最穩最捷者也。罨法見新方因類第三十

陰厥陽厥 三十九

附藏厥虵厥

厥有二證。曰陽厥。曰陰厥也。陽厥者。熱厥也。必其先自二陽傳入陰分。故其初起。必因頭疼發熱。自淺入深。然後及於三陰。變爲四肢逆冷。或時乍溫。其證必便結躁煩讖語發渴。不惡寒。反惡熱。脉沉有力。此以傳經熱證所化。外雖手足厥冷。內則因於熱邪。陽證發厥。故爲陽厥。乃陽極似陰也。其證由邪熱內結。或伏陽失下之所致也。凡厥微則熱亦微。宜四逆散之類。厥甚則熱亦甚。宜承氣湯之類也。○陰厥者。寒厥也。初無三陽傳經實熱等證。而真寒直入三陰。則畏寒厥冷。腹痛吐瀉。戰慄不渴。脉



沉無力者。此陰寒厥逆。獨陰無陽也。故爲陰厥。輕則理中湯。重則四逆回陽等湯主之。

成無已曰。四逆者。四肢不溫也。傷寒邪在三陽。則手足必熱。傳到太陰。手足自溫。至少陰。則邪熱漸深。故四肢逆而不溫也。及至厥陰。則手足厥冷。是又甚於逆。故用四逆散以散其傳陰之熱證。

論曰。諸四逆厥者。不可下之。虛家亦然。○成無已註曰。四逆者。四肢不溫也。厥者。手足冷也。甚於四逆也。皆陽氣少而陰氣多。故不可下。虛家亦然。金匱玉函曰。虛者十補勿一瀉之。

論曰凡厥者陰陽氣不相順接便爲厥厥者手足逆冷是也○  
病者手足厥冷言我不結胸小腹滿按之痛者此冷結在臍  
臍關元也○傷寒發熱四日厥反三日復熱四日厥少熱多  
其病當愈○傷寒厥四日熱反三日復厥五日其病爲進寒  
多熱少陽氣退故爲進也○若厥而嘔胸脇煩滿者其後必  
便血

論曰少陰病下利清穀裏寒外熱手足厥逆脈微欲絕身反不  
惡寒其人面赤色或腹痛或乾嘔或咽痛或利止脈不出者  
通脈四逆湯主之○傷寒脈促手足厥逆者可灸之○傷寒

脉滑而厥者、裏有熱也、白虎湯主之。○手足厥寒、脉細欲絕者、當歸四逆湯主之。若其人內有久寒者、宜當歸四逆加吳茱萸生薑湯主之。○大汗出、熱不去、內拘急、四肢疼、又下利、厥逆而惡寒者、四逆湯主之。○大汗若大下利而厥逆者、四逆湯主之。○病人手足厥冷、脉乍緊者、邪結在胸中、心中滿而煩、饑不能食者、病在胸中、當須吐之、宜瓜蒂散。○傷寒厥而心下悸者、宜先治水、當服茯苓甘草湯、却治其厥、不爾水漬入胃、必作利也。○下利清穀、裏寒外熱、汗出而厥者、通脉四逆湯主之。○嘔而脉弱、小使復利、身有微熱、見厥者、難治。

四逆湯主之

按陽厥陰厥其辨如前此先哲之大法也然愚則猶有所辨如陰厥一證既無陽證陽脉而病寒若此明是陰證今人但曰中寒者卽其病也然犯此者無幾知此者無難治宜溫中無待辨也惟是陽厥一證則有不得不辨者夫厥由三陽所傳是爲陽厥此固然矣卽以傳經者言之又豈盡無陰證乎故凡病真陽不足者卽陽中之陰厥也脉弱無神者卽陽中之陰厥也攻伐清涼太過者卽陽中之陰厥也四肢爲諸陽之本使非有熱結煩渴脹實等證而見厥逆者皆由陽氣不足



也。成無已曰：大抵厥逆爲陰，所主寒者多矣。又曰：厥爲陰之盛也。故凡屬挾虛傷寒，則雖自陽經傳入者，是亦陽中之陰厥也。陰中之陰者，宜溫陽中之陰者，果宜涼乎？學者勿謂其先有頭疼發熱，但自三陽傳至者，便爲陽厥，而寒因熱用之，則爲害不小矣。

一、臟厥證。仲景曰：傷寒脈微而厥，至七八日膚冷，其人躁無暫安時者，此爲臟厥。臟厥者，死。陽氣絕也。

一、虵厥證。仲景曰：虵厥者，其人當吐虵，令病者靜而復時煩，此爲臟寒。虵入膈，故煩。須臾復止，得食而嘔，又煩者，虵聞食

臭出其人當自吐。蛇厥者烏梅丸主之。○成無已曰：臟厥者死，陽氣絕也。蛇厥雖厥而煩，吐蛇已則靜，不若臟厥而躁無暫安時也。病人臟寒胃虛，故宜與烏梅丸溫臟安蟲。

○讖語鄭聲 四十

論曰：實則讖語，虛則鄭聲。此虛實之有不同也。夫讖語鄭聲，總由神魂昏亂而語言不正，又何以分其虛實？但讖語者，狂妄之語也；鄭聲者，不正之聲也。讖語為實，實者邪實也，如傷寒陽明實熱上乘於心，心為熱，胃則神魂昏亂而讖妄不休者，此實邪也。實邪為病，其聲必高，其氣必壯，其脈必強，其色必厲，凡登高

罵詈狂呼躁擾之類皆是也。此之爲病有燥撰在胃而然者有  
瘀血在臟而然者有火盛熱極而然者有腹脹便秘口瘡咽爛  
而然者察其果實卽當以三承氣或白虎湯涼膈散之類治之  
○鄭聲爲虛虛者神虛也如傷寒元神失守爲邪所乘神志昏  
沉而錯亂不正者此虛邪也虛邪爲病其聲必低其氣必短其  
脉必無力其色必萎悴凡其自言自語喃喃不全或見鬼怪或  
驚恐不休或問之不應答之不知之類皆是也此之爲病有因  
汗亡陽因下亡陰而然者有焦思抑鬱竭厥心氣而然者有勞  
力內傷致損脾腎而然者有日用消耗暗殘中氣而然者凡其

或雖起倒而邊之卽止終不若實邪之難制者卽虛邪也察其  
果虛最忌妄行攻伐少有差謬無不卽死治此者速宜察其精  
氣辨其陰陽舍其外證救其根本稍遲猶恐不及而况於誤治  
乎甚至有自利身寒或尋衣撮空面壁啐啐者尤爲逆候蓋讖  
妄一證最於虛損者不宜有之故凡身有微熱脉見洪滑者生  
心多煩躁脉見微弱細急而逆冷者死所以證逢虛損而見有  
讖妄者卽大危之兆不可不加之意也

衄血 四十一

雜病衄血責熱在裏傷寒衄血責熱在表論曰傷寒小便清者



知不在裏仍在表也。當發其汗。若頭痛者必衄。宜桂枝湯。○曰傷寒脉浮緊不發汗。因致衄者。麻黃湯主之。此以傷寒之衄爲其熱不在裏在表而然也。然又論曰衄家不可發汗。而何以復用桂枝麻黃等湯。蓋衄由乎陰者。以陰虛火動也。故不宜再汗。以亾陰。衄由乎陽者。以表邪未解也。故當用桂枝麻黃以發散。又論曰太陽病脉浮緊發熱身無汗。自衄者愈。此以表邪欲解不從汗而從血。俗人謂之紅汗。所以衄後當愈也。由此觀之。則有因衄而愈者。以經通而邪散也。有治衄仍當發散者。以邪之將解未解。而因散其餘邪也。治衄之法。於斯可見。若寒氣不甚。

而用麻黃桂枝似屬太剛或易以柴葛之類自無不可用者其酌之

論曰陽明病口燥但欲漱水不欲嚥者此必衄蓋陽明之脈絡於口鼻今其漱水不欲嚥者以熱在經而裏無熱故當鼻衄也

一有動陰血者又非衄血之謂論曰少陰病但厥無汗而強發之必動其血未知從何道出故或從口鼻或從目出者是名下厥上竭此陰血也乃爲危證

畜血 四十二

傷寒畜血者以熱結在裏搏於血分留瘀下焦而不行也論曰  
傷寒有熱少腹痛應小便不利今反利者爲有血也○又曰太  
陽病身黃脈沉結少腹鞭小便不利者爲無血也小便自利其  
人如狂者血證諦也大抵熱畜血分留結下焦則生狂躁論曰  
熱結膀胱其人如狂者是也然又有陽明證其人喜忘尿雖鞭  
而大便反快其色黑者是亦畜血之證故凡診傷寒但其少腹  
鞭滿而痛便當問其小便若小水自利者知爲畜血之證蓋小  
水由於氣化病在血而不在氣故小便利而無恙也血瘀於下  
者血去則愈其在仲景之法則以抵當湯抵當丸主之愚謂但

以承氣之類加桃仁紅花以逐之。或其兼虛者以玉燭散之類下之。則畜血自去。而病無不除矣。

成無已曰。傷寒衄者。以邪氣不得發散。壅盛於經。逼迫於血。因而致衄也。畜血者。下焦結聚而不行不散也。血菀於上。而吐血者。謂之薄厥。留瘀於下者。謂之畜血。此由太陽經瘀熱在裏。搏畜下焦所致。經曰。太陽病七八日。表證仍在。脈沉而微。反不結胸。其人如狂者。以熱在下焦。少腹當鞕滿。小便自利者。下血乃愈。

熱入血室

四十三



論曰陽明病下血譫語者此爲熱入血室是兼男女而言也○  
曰婦人中風七八日續得寒熱發作有時經水適斷者此爲熱  
入血室其血必結故使如瘧狀發作有時小柴胡湯主之○曰  
婦人中風脈遲身涼而證如結胸者當刺期門○曰婦人傷寒  
經水適來晝日了了暮則譫語者無犯胃氣及上二焦必自愈  
按血室者卽衝任血海也亦血分也凡血分之病有畜血者以  
血因熱結而留畜不行也有熱入血室者以邪入血分而血  
亂不調也故血畜者去之則愈血亂者調之則安調之之法  
則熱者宜涼陷者宜舉虛者宜滋瘀者宜行邪未散者宜解

也然此皆病在下焦故曰無犯胃氣及上三焦必自愈是又不可不察

△胸脇腹滿 四十四

凡邪氣自表傳裏必先入胸膈以次漸從脇肋而後入胃邪氣入胃乃爲入府是以胸滿者猶屬表證脇滿則半表半裏也大抵胸脇滿者以邪氣初入於裏氣鬱不行所以生滿尚未停聚爲實故但從和解以小柴胡之屬則可愈矣若果實邪在上蓄滯不能散者乃可吐之華元化曰四日在胸吐之則愈是因邪已收聚而未及散漫者乃可吐也在仲景用梔子豉湯或瓜蒂

散之屬梔子豉湯可吐客熱瓜蒂散可吐實痰其或一時藥有不便余有吐法在新方攻陣中可以代之或即以和解之藥探而吐之無不可也

一腹滿證按華元化曰傷寒一日在皮二日在膚三日在肌四日在胸五日在腹六日在胃入胃卽爲入府入府卽在腹也若腹雖滿而未甚者猶是未全入府不可攻也然腹滿之證有虛實也有寒熱也不可一槩皆以實論觀金匱要略曰腹滿不減減不足言當下之是不減者爲實滿也又曰腹滿時減復如故此虛寒從下上也當以溫藥和之是或進或退持

或感而時復如故者本非結聚實邪此虛滿也大抵腹滿之  
證本屬太陰若是陽邪則必閉乾煩熱脉實有力若是陰邪  
則必腹滿吐食畏寒自利脉息無神可以辨之實熱者可清  
可攻虛寒者宜溫宜補也

嘔吐藏證四十五

嘔者有聲無物吐者吐出食物也嘔者有寒有熱吐則皆因胃  
寒也凡嘔而發熱煩悶者邪熱爲嘔也嘔而吞酸冷嘔涎沫沉  
沉者寒邪爲嘔也大抵傷寒表邪將傳入裏裏氣相逆則爲嘔  
是以半表半裏之邪其證多嘔若邪生在表無是證也凡邪在



半表半裏者和之散之氣逆者順之有痰者降之熱者清之寒者溫之千金云嘔家多服生薑此是嘔家聖藥然嘔家雖有陽明證不可攻之蓋其氣逆在上而邪未入府本非胃實證也氣逆於上而攻其下下虛則逆氣乘之勢必大危若脉微弱者乃爲尤甚

凡傷寒三陽傳畢三陰當受邪矣若其人反能食而不嘔此爲邪不入陰是知邪之傳裏者乃致爲嘔也觀乾薑附子湯證治云不嘔不渴者爲裏無熱十棗湯證治云乾嘔短氣汗出不惡寒者此表解裏未和也卽此觀之則凡嘔者知爲裏證

而兼煩渴者方為內熱也

仲景論曰食穀欲嘔者屬陽明也吳茱萸湯主之得湯反劇者屬上焦也○曰少陰病吐利手足厥冷煩躁欲死者吳茱萸湯主之

論曰病人脈數數為熱當消穀引飲而反吐者此以發汗令陽氣微膈氣虛脈乃數也數為客熱不能消穀以胃中處冷故吐也○東垣曰邪熱不殺穀故熱邪在胃則不食

論曰陽明病不能食攻其熱必噦所以然者胃中虛冷故也以其人本虛故攻其熱必噦○若胃中虛冷不能食者飲水則

噦○若膈上有寒飲乾嘔者不可吐也。急溫之。宜四逆湯。

論曰傷寒噦而腹滿視其前後知何部不利利之則愈○治噦

諸法詳呃逆門

△勞力感寒 四十六

凡因辛苦勞倦而病者。多有患頭痛發熱惡寒。或骨腿痠疼。或微渴。或無汗。或自汗。脉雖浮大而無力。亦多緊數。此勞力感寒之證。卽東垣云。內傷證也。宜補中益氣湯。或補陰益氣煎。及五福飲等劑爲良。所謂溫能除大熱。卽此類也。若或邪盛無汗。脉見洪數。而當和解者。卽當用新方散陣。諸柴胡飲之類主之。

一凡勞力感寒一證人皆以服役辛苦之人爲言而不知凡爲名利所牽有不自揣以致竭盡心力而患傷寒者皆其類也故凡有形勞而神不勞者勞之輕者也若既勞其神又勞其形內外俱勞則形神俱困斯其甚矣今人之病傷寒者率多此類輕者和解治宜如前重者速宜救本當於後開培補諸方擇而用之庶乎有濟倘不知其所致之由而槩施混治但知攻邪則未有不誤人者矣此卽勞倦內傷之類諸義具詳本門

虛證 四十七



仲景曰陽微則惡寒陰弱則發熱是寒熱之有虛也○曰其人本虛是以發戰是戰汗之皆因虛也○曰耳聾無聞者陽氣虛也○曰面赤戴陽者陰不足也○曰無陽不能作汗必身冷而脉遲也○曰客熱不能殺穀胃中虛冷也○曰病人脉數數爲熱當消穀引飲而反吐者此以發汗令陽氣微膈氣虛脉乃數也數爲客熱不能消穀以胃中虛冷故吐也○曰虛則鄭聲以言語亂而不正也○曰身踈惡寒而利因冷極而爲厥逆也○曰尺中脈微此裏虛須表裏實津液自和便自汗出愈○曰脉促厥冷者宜灸以促脉有非因熱也○曰頭疼嘔吐之宜溫以

頭疼之有屬陰也。○曰不利而利發熱汗出者有陰無陽也。○  
曰少陰脉沉者汗後熱不去而厥利惡寒者皆宜急溫也。○曰  
舊有微溏者不可與梔子湯以裏虛而寒在下也。○曰陽明病  
不能食攻其熱必噦所以然者胃中虛冷故也飲之水亦噦也。  
○曰小便色白者以下焦之虛寒也。○曰自利不渴者以臟中  
之無火也。○曰邪中於陰者必生內慄因表氣虛而裏氣不守  
也。○曰發汗過多其人又手自冒心心下悸而欲得按者亡其  
陽也。○曰發汗病不解而反惡寒者虛故也。○曰脉陰陽俱緊  
反汗出者亡其陽也。

一諸脉有虛證見前卷

一忌汗下各有虛證見前卷

一表裏五藏各有虛實詳一卷傳忠錄虛實辨中俱當互閱

動氣 四十八

論曰諸動氣者不可發汗亦不可下。○按此動氣一證卽築築然動於臍傍及左乳之下曰虛里者皆其聯絡者也考之難經則以臍之上下左右分心腎肝肺四臟而各列其證在傷寒論所載亦詳成無已曰動氣者臟氣不治正氣內虛也雖諸說如此然皆未盡其要所以今之醫家多不識此爲何證

而且疑爲未見此證也。余嘗留心察此所見極多。蓋動氣之在臍傍者，皆本於下焦之陰分。凡病關格勞損者，多有此證。而尤於瘦薄者易見之。其動之微者，則止於臍傍上下。其動之甚者，則連及虛里心脇。真若春春連續，而混身皆振動者。此以天一無根，故氣不蓄藏，而鼓動於下。誠真陰不守，大虛之候也。何以驗之？但察於呼吸饑飽之頃，可得其徵。凡病此者，餒時則動甚，飽時則稍緩。呼出則動甚，吸入則稍緩。但虛甚者動必甚，虛微者動亦微。豈非虛實之明證乎？卽在病者，雖常覺其振動，而無疼無癢，尙不知爲何故。醫家多不以爲



意弗能詳察故不知爲何病此動氣之不明也久矣此動氣之見於虛損者極多而見於傷寒者亦不少也精虛者旣不可汗陰虛者又不可下仲景但言其禁而不言其治然則動氣之治豈無法乎獨於霍亂條中云臍上築者腎氣動也用理中丸去朮加桂四兩以治之此其意在脾腎槩可知也然余之治此則惟直救真陰以培根本使其氣有所歸無不獲效欲察虛實者最不可忽此一證類經虛里穴下有詳註當益考之

論曰脉浮而緊按之反芤此爲本虛故當戰而汗出也其人本虛是以發戰以其脉浮故當汗出而解○若脉浮大而數按之不芤此本不虛故其欲解則但汗出而不發戰也

一戰與慄異戰由乎外慄由乎內也凡傷寒欲解將汗之時若其正氣內實邪不能與之爭則但汗出自不作戰所謂不戰應知體不虛也若其人本虛邪與正爭微者爲振甚則爲戰正勝邪則戰而汗解矣故凡邪正之爭於外者則爲戰戰其愈者也邪正之爭於內者則爲慄慄其甚者也論曰陰中於邪必內慄也夫戰爲正氣將復慄則邪氣肆強故傷寒上六七

日有但慄不戰。竟成寒逆者。多不可救。此以正氣中虛。陰邪內盛。正不勝邪。而反爲邪氣所勝。凡遇此證。使非用大補溫熱之劑。及艾灼回陽等法。其他焉得而禦之。

余嘗治一衰翁。年踰七旬。陡患傷寒。初起卽用溫補。調理至十日之外。正氣將復。忽爾作戰。自旦至辰。不能得汗。寒慄危甚。告急於余。余用六味回陽飲。入人參一兩。薑附各三錢。使之煎服。下咽少頃。卽大汗如浴。時將及午。而浸汗不收。身冷如脫。鼻息幾無。復以告余。余令以前藥復煎與之。告者曰。先服此藥。已大汗不堪。今又服此。尚堪再汗乎。余笑謂曰。此中有

神非爾所知也。急令再進。遂汗收神復。不旬日而起矣。嗚呼。發汗用此。而收汗復用此。無怪乎人之疑之也。而不知汗之出。與汗之收。皆元氣爲之樞機耳。故余紀此。欲人知閤闢之權。不在乎能放能收。而在乎所以主之者。

頭汗 五十

頭汗之證有二。一爲邪熱上壅。一爲陽氣內脫也。蓋頭爲諸陽之會。凡傷寒徧身得汗者。謂之熱越。若身無汗。則熱不得越。而上蒸陽分。故但頭汗出也。治熱蒸者可清。可散。甚者。可下。在去其熱。而病自愈。至若氣脫一證。則多以妄下傷陰。或尅伐太過。



或泄瀉不止以致陰竭於下則陽脫於上小水不通而上見頭汗則大危矣

論曰傷寒五六日頭出汗微惡寒手足冷心下滿口不欲食大便難脉細者此爲陽微結乃半在裏半在外也脉雖沉緊不得爲少陰病所以然者陰不得有汗今頭汗出故知非少陰也可與小柴胡湯得屎而解○曰傷寒五六日已發汗而復下之胸脇滿微結小便不利渴而不嘔但頭汗出往來寒熱心煩者此爲未解也柴胡桂枝乾薑湯主之

論曰傷寒十餘日但結胸無大熱者此爲水結在胸脇也但頭

汗出者大陷胸湯主之○曰陽明病下血譫語者此爲熱入血室但頭汗出者刺期門隨其實而瀉之濺然汗出則愈

論曰太陽病醫反下之若不結胸但頭汗出餘處無汗際頸而還小便不利身必發黃也○曰陽明病但頭汗出小便不利必發黃

論曰濕家下之額上汗出微喘小便不利者死若下利不止者亦死

脉經曰陽氣上出汗見於頭者蓋陽脫也

一頭汗脉緊數有表邪當散者宜小柴胡湯或柴胡桂枝乾薑

湯及新方諸柴胡飲俱可酌用。○若有火邪脈洪滑內多煩熱頭汗當清者宜人參白虎湯益元散之類主之。○若水結胸心下滿頭汗出者或大陷胸湯或小半夏茯苓湯。○若便結腹脹疼痛頭汗者宜承氣湯。○若諸虛泄瀉陽脫頭汗者宜速用獨參湯或大補元煎六味回陽等飲作急救之庶可保。

吐衄 五十一

凡治傷寒若見吐衄者雖有大熱忌用涼藥犯之必死蓋胃中有寒陽氣弱極則衄逆而上此大凶之兆也急用炮薑理中湯

一服加烏梅二個、花椒一二十粒、服後待虵定、然後以小柴胡或補中益氣等劑、漸治其餘、蓋虵聞酸則靜、見苦則安也。○仲景曰、病人有寒、復發汗、胃中冷、必吐虵。○虵厥證、見前三十九。

腹痛 五十二

陶節菴曰、傷寒腹痛有四、若遶臍鞭痛、大便結實、煩渴者、皆屬燥、屎痛急、用寒藥下之、因食積而痛者、治亦同。

一若小腹鞭痛、小水自利、大便黑、身目黃者、屬畜血痛、亦用寒劑、加行血藥、下盡黑物自愈。

一凡傷寒腹中痛甚、但將凉水一盞、與病者飲、而試之、若飲水



後痛稍可者屬熱痛當用涼藥清之○以上三條皆實熱痛也必脈來沉實有力方是此證若微弱者仍當詳審從緩治之

一若飲水愈加作痛此爲寒痛當用溫藥和之和之不已而或四肢厥冷嘔吐瀉利者急用熱藥救之但須詳脈之有力無力方爲良法

△下利 五十三

凡雜證下利多責於寒傷寒下利有寒有熱蓋熱邪傳裏則亦有下利之證但寒利最多熱利則僅見耳治者當辨寒熱若誤

用之則爲害最大

仲景論曰自利不渴者屬太陰以其臟有寒故也當溫之宜服  
四逆輩○少陰病二三日至四五日腹痛小便不利下利不  
止便膿血者桃花湯主之○少陰病吐利手足厥冷煩躁欲  
死者吳茱萸湯主之○少陰病下利白通湯主之○少陰病  
二三日不已至四五日腹痛小便不利四肢沉重疼痛自下  
利者此爲有水氣其人或欬或小便利或下利或嘔者真武  
湯主之○少陰病下利清穀裏寒外熱手足厥逆脈微欲絕  
身反不惡寒其人面色赤或腹痛或乾嘔或咽痛或利止脈

不出者。四逆湯主之。○大汗出。熱不去。內拘急。四肢疼。下利厥逆。而惡寒者。四逆湯主之。○下利清穀。不可攻表。汗出必脹滿。

按此諸論。乃皆言寒利之當溫也。如所云。手足厥逆。惡寒腹痛。脈微欲絕。下利清穀之類。此固陰寒之甚者也。其於疑似之間。則猶有真辨。凡傷寒下利。由熱邪者。必有煩躁大熱。酷欲冷水等證。亦必有洪滑強盛數實等脈。如果表裏俱熱。方可作火證論治。若其脈雖數而無力。外雖身熱而不惡熱。內雖渴而不喜冷。此其內本不熱。而病爲下利者。悉屬虛寒。治

宜四逆湯、理中湯、溫胃飲、胃關煎、五苓散之類、酌用可也。或表裏寒邪俱甚、則當以麻桂飲相兼用之、爲最妥。若以寒利作熱利、妄用寒涼、再損胃氣、則無有不死。

論曰、下利腹脹滿、身體疼痛者、先溫其裏、乃攻其表、溫裏四逆湯、攻表桂枝湯。

按此一條、乃言表裏俱病、而下利者、雖有表證、所急在裏、蓋裏有不實、則表邪愈陷、卽欲表之、而中氣無力、亦不能散、故凡見下利中虛者、速當先溫其裏、裏實氣強、則表邪自解、溫中可以散寒、卽此謂也。



論曰熱利下重者白頭翁湯主之。○下利脈數欲飲水者以有熱故也。白頭翁湯主之。○少陰病下利六七日。欬而嘔渴。心煩不得眠者。猪苓湯主之。

按此三條乃言熱利之當清也。但既云脈數又欲飲水是誠熱矣。然寒邪在表。脈無不數。但數而有力者爲陽證。數而無力者卽陰證矣。瀉利吐津無有不渴。但渴欲飲水愈多愈快者爲陽證。若口雖欲水而腹不欲嚥者卽非陽證矣。此外如渴欲茶湯者乃瀉渴之當然也。不得悉認爲熱證。○一凡傷寒表邪未解。脈實滑數喜冷氣壯。內外俱熱而下利者宜柴

苓煎主之。

論曰少陰病自利清水色純青心下必痛口乾燥者急下之宜  
大承氣湯○下利三部脉皆平按之心下鞭者急下之宜大  
承氣湯○下利譫語者有燥屎也宜小承氣湯

按此三條乃言下利之當攻者也凡傷寒下利者本非陽明  
實邪不當譫語今旣譫語故知有燥屎當去也又若少陰下  
利心下有痛有鞭者必有所積故亦當下

一凡自利家身涼脉小者爲順身熱脉大者爲逆此以外無表  
證而病之在臟者言也○下利日十餘行脉反實者死○發

熱下利至甚厥不止者死○直視讖語下利者死○下利無  
脈手足厥冷炎之不溫脈不還者死○少陰病自利煩躁不  
得臥寐者死○大抵下利一證爲脫氣至急五奪之中惟此  
爲甚金匱要略曰六府氣絕於外者手足寒五臟氣絕於內  
者利下不禁臟氣旣脫不能治也

協熱下利 五十

仲景曰若不宜下而便攻之內虛熱入協熱遂利煩躁諸變不  
可勝數輕者困篤重者必死矣○太陽病二三日不能臥反下  
之若利止必作結胸未止者四日復下之此作協熱利也○太

陽病外證未除而數下之遂協熱而利利下不止心下痞鞭表裏不解者桂枝人參湯王之○陽明少陽合病若脈數不解而下不止必協熱而便膿血也

按此四條乃皆言表證未除而誤下之因致外熱未退內復一作利故云協熱下利此一熱字乃言表熱也非言內熱也夫協者協同之協非挾藏之挾卽表裏俱病之謂故治此者止有桂枝人參湯一方其義顯然可見卽如成無已明理論曰表邪傳裏裏虛協熱則利乃亦以表邪爲言也奈何後學不明此義止因協熱二字每每以表作裏以寒作熱但見作利



者無論表裏虛實卽認爲內熱便云協熱下利且近有不必  
誤下而妄用苓連治表熱者表證得寒熱愈不退乃致下利  
或脾胃素弱逢寒卽泄者皆是此證旣見下利益云協熱其  
謬孰甚獨不觀仲景桂枝人參湯豈治內熱之劑乎寒熱倒  
施殺人多矣予因特表於此

小便 五十五

凡傷寒小便清者病不在裏仍在表也當解表發汗○小便利  
者病不在氣分而在血分以小水由於氣化也  
陽盛則欲衄陰虛小便難

凡病傷寒而小水利者多吉。以內邪不甚也。

仲景曰：陽明病汗出多而渴者，不可與猪苓湯。以汗多必胃燥，故不可復利。小水也。

論曰：濕家之爲病，一身盡痛，發熱，身色如熏黃。其人但頭汗出，背強，欲得被覆，向火，舌上如胎者，以丹田有熱，胸中有寒，渴欲得水而不能飲，此濕痺之候。其人小便不利，大便反快者，但當利其小便。

凡傷寒表證未除，病在陽分者，不可卽利小便。蓋走其津液，取汗愈難，且恐大便乾結也。

死證 五十六

陶節菴曰凡看傷寒極要識各經中死證死脉須一一理會過免致臨病疑惑但見死證便當以脉參之如果有疑切莫下藥雖至親挽懇亦不可治倘有差失咎將歸於已矣

一脉浮而洪身汗如油喘而不休水漿不入形體不仁乍靜乍亂此命絕也○汗出髮潤喘而不休此肺絕也○形如烟煤直視搖頭此心絕也○唇吻色青四肢振動此肝絕也○環口黎黑冷汗發黃此脾絕也○溲便遺失狂言及目直視此腎絕也

一少陰病惡寒身蹇而利手足逆冷者不治。○少陰病吐利躁煩四逆者死。○少陰病四逆身蹇脈不至不煩而躁者死。○少陰病六七日息高者死。○少陰病至五六日自利煩躁不得臥寐者死。○少陰病下利厥逆無脈服藥後脈微續者生。脈暴出者死。○少陰病但厥無汗而強發之必動其血未知從何道出或從口鼻或從目出是名下厥上竭爲難治。

一陰病見陽脈者生陽病見陰脈者死。○脈純弦者死。○脈陰陽俱盛大汗出熱不解者死。○陽俱虛熱不止者死。○脈陰陽俱盛大汗出熱不解者死。○手足逆冷脈沉細澀言妄語者死。○脈證俱虛而見讖妄者



死○傷寒六七日、脈微手足厥冷、煩躁灸厥陰、厥不還者死。  
○寸脈上不至、關爲陽絕、尺脈下不至、關爲陰絕、此皆不治  
決死也。○傷寒下利日十餘行、脈反實者死。

一傷寒病、脇下素有痞氣、連於臍傍、痛引少腹、入陰筋者、此名  
臍結死。○發熱下利、厥逆躁不得臥者死。○發熱下利至甚  
厥不止者死。○直視、譏語、喘滿者死。下利者亦死。○下利發  
熱者亦死。○發熱而厥七日下利者難治。○傷寒六七日發  
熱而利、汗出不止者死、有陰無陽故也。○陽氣前絕、陰氣後  
絕者、陰證也。其人死後身色必青。○陰氣前絕、陽氣後絕者、

陽證也其人死後身色必赤臚下溫心下熱也

金匱要略曰六府氣絕於外者手足寒五臟氣絕於內者利下不禁蓋傷寒發熱為邪氣獨甚若下利至甚厥不止此以邪未解而府臟之氣先絕故死

靈樞熱病篇曰熱病不可刺者有九一日汗不出大顴發赤噦者死○二日泄而腹滿甚者死○三日目不明熱不已者死○四日老人嬰兒熱而腹滿者死○五日汗不出嘔下血者死○六日舌本爛熱不已者死○七日欬而衄汗不出出不至足者死○八日髓熱者死○九日熱而瘕者死腰折瘕癎

齒噤齧也

傷寒逆證賦 五十七

傷寒難療、逆證須知、陽病怕逢陰脈、譫語陰證非宜、乍踈乍數、  
脈之忌、口張目陷、舌如煤、乾嘔出氣、骨節痛而呃逆、弗已、發斑  
發黃、大便利而先赤後灰、霍亂躁煩、心下悶而喘脹、腹膨呃逆、  
下泄利而難澁、四肢厥逆、眼定腹疼如石、內外關格、頭汗陽脫、  
溲澀、頭連胸痛、四肢冷、聲啞唇瘡、狐惑、悲七日已過、復大熱、喘  
逆上氣、脈散危、陰陽易、脈離經而外腎腫、手足攣拳、加腹痛、陰  
陽交、大汗後而熱愈甚、躁疾狂言、食更稀、厥利無脈、灸而不至

者腎殆唇青舌卷耳聾囊縮者肝離赤斑黑斑救五而收一尋  
衣撮空而感者何疑凡諸汗證仍當備言只在頭面不遍身鼻  
衄不止口噤肉戰多喘促如油汗圓當汗無汗麻黃數劑不能  
通尤嫌脈躁汗後嘔吐水藥不入證反劇言亂目眩濕家大汗  
必成瘧風濕與膽皆譫言犯濕溫則身青面變耳聾不語名重  
暍發少陰必九竅出血下厥上竭奚能痊動氣脈遲弱皆忌風  
濕和中濕不堪其諸下利尤宜細察熱厥利而汗難止冷厥利  
而躁不眠少陽陽明合病脈弦者負少陰吐瀉無脈拳厥躁煩  
譫語直視而喘滿下利頻數而脈堅臟結者臍痛引陰白胎下



利除中則厥逆而利反能食焉誤下濕家之頭汗漉難便利喘  
加添體如熏而搖頭直視心神已絕唇吻青面四肢多汗肝氣  
不全腎絕者直視狂言而遺尿反目肺絕者喘無休歇而汗潤  
髮顛虛汗發黃環口黑非脾經之吉兆孤陽偏勝脈暴出知陰  
絕之在先此傷寒之逆候勿僥倖以圖全

傷寒治例 五十八

汗散類

溫散諸方

麻黃湯散 一

大溫 凡太陽陽明傷寒而陰邪甚者

宜此

桂枝湯 散九

大溫 凡太陽中風兼寒有汗者宜此

麻桂飲 新散七

大溫 凡傷寒初感邪盛氣實者無論

諸經四季先宜用此

二柴胡飲 新散二

微溫 凡邪感三陽及三陽併病寒

勝者宜此主之三陰初感者亦可用

葛根湯 散二九

大溫 治冬月太陽經傷寒項背強無

汗惡風者宜此

五積散 散三九

微溫 凡感寒邪而陰勝於陽外有表

證內有嘔吐腹痛及寒濕客於經絡筋骨痠疼等證宜此

十神湯 散四十

微溫

凡時氣風寒溫疫發熱憎寒頭

疼欬嗽無汗當溫散者宜此

麻黃附子細辛湯 散三

大溫 少陰傷寒脉沉發熱者

宜此

小青龍湯 散八

大溫

凡傷寒陰勝表邪不解及心下

有水氣嘔噦欬嗽發熱小腹滿者宜此

消風百解散 散四六

微溫

凡四時傷寒頭疼發熱及

風寒欬嗽鼻塞聲重者宜此

柴胡桂枝乾薑湯

散百十四

微溫

傷寒汗下後但頭

汗出寒熱往來邪不解者宜此

桂枝加黃耆湯

散十

大溫

黃疸脈浮當以汗解者宜

此

涼散諸方

一柴胡飲

新散一

微涼

凡六經初感內外俱有熱者

宜此

小柴胡湯

散十九

微涼

凡邪在少陽及三陽併病但



屬半表半裏往來寒熱兼嘔者宜此

九味羌活湯

散四四

微涼

凡四時不正之氣風寒感

冒憎寒壯熱頭疼身痛者宜此

柴葛解肌湯

散三一

微涼

凡足陽明證發熱脈洪者

宜此

升麻葛根湯

散三十

微涼

陽明證具及小兒疫癘瘡

疹等證宜此

歸葛飲

新散十三

次涼

凡陽明溫暑大熱大渴津

枯不能作汗者宜此

六神通解散 寒十五

大涼 凡發熱頭痛脉洪無汗三

陽伏火而表邪不解者宜此

柴胡白虎煎 新散十

大寒 凡溫病熱極表裏不解者

宜此

柴平湯 和二三三

微涼 凡溫瘧身痛手足沉重寒

熱者宜此

柴苓煎 新散十

大涼 凡表邪未解內外俱熱泄

瀉不止者宜此

大青龍湯 散七

微寒 凡太陽中風發熱無汗而

躁煩者宜此

升麻湯 散百十三

宜此

大寒

凡無汗而喘煩渴發斑者

四逆散 散二八

宜此

微涼

凡陽邪亢極四肢厥逆者

平散諸方

三柴胡飲 新散三

凡肝脾陰虛血少而偶感風寒者

宜此

正柴胡飲 新散六

凡血氣本無虧損而感冒寒邪者

宜此

柴陳煎 新散九

凡感冒風寒發熱而兼欬嗽嘔惡

者宜此

參蘇飲 散三四

凡四時感冒傷寒頭痛發熱無汗

及欬嗽聲重往來潮熱者宜此

敗毒散 散三六

凡四時瘟疫寒熱身體疼痛及烟

瘴之氣或處卑濕脚氣者宜此

升陽散火湯 散四一

凡胃虛血虛因寒邪冷物抑遏陽

氣以致發熱者宜此發之



加減小柴胡湯 散二

凡少陽經寒熱往來脉弦腹痛者

宜此

兼補兼散諸方

補中益氣湯 補三一

凡勞倦傷脾中氣不足以致外感

發熱者宜此

補陰益氣煎 新補十六

凡邪陷陰中陰虛不能作汗身熱

不退或往來寒熱者宜此

三柴胡飲 新散三

凡肝脾血分微虛而感外邪者宜

此

四柴胡飲 新散四

凡脾肺氣虛或勞倦感寒發熱者

宜此

五柴胡飲 新散五

凡脾腎血氣不足而感外邪發熱

者宜此

理陰煎 新熟三

大溫 凡真陰不足或因勞倦感

寒陰虛假熱寒邪不解者速宜用此

大溫中飲 新散八

大溫 凡中氣虛寒感邪發熱無

汗表不能解者速宜用此

調中益氣湯 補三二

凡風寒濕熱所傷食少體重者宜

此

溫中和中類

大溫兼補諸方

人參理中湯 熱一

痛嘔吐中氣虛寒脹滿厥逆瘧痢等證

四逆湯 熱十四

大溫 治傷寒陰證自利脉沉身

痛而厥

胃關煎 新熱九

大溫 凡脾腎虛寒瀉利不止者

宜此

桂枝人參湯 散十三

大溫 傷寒表裏不解協熱下利

者宜此

白通湯 熱一 二六

大熱 少陰下利者宜此

桃花湯 熱一 四七

微溫 少陰下利膿血者宜此

真武湯 熱一 四三

大溫 少陰傷寒腹痛或嘔或利

者宜此

回陽返本湯 熱四 五

大溫 傷寒陰盛格陽陰極發躁

脈弱無力者宜此

四味回陽飲 新熱一

大溫 陽脫氣虛者宜此



煖肝煎 新熱十五

大溫 凡肝腎陰寒小腹疼痛者

宜此

吳茱萸湯 熱一三八

大熱 嘔而胸滿吐涎頭痛者宜

此

當歸四逆湯 熱二十

微溫 傷寒厥逆脉細下利腸鳴

者宜此

茯苓甘草湯 熱七六

大溫 水停心下作悸作利者宜

此

甘草附子湯 熱三一

大熱 風濕相搏者宜此

桂枝附子湯 熱三十

大熱 風濕相搏筋骨疼痛者宜

此

乾薑附子湯 熱三四

大熱 瘴毒陰證厥逆嘔吐自利

汗出者宜此

華陀救陽脫方 熱六四

治陰寒直中三陰證

微溫和中諸方

一 二陳湯 和一

微溫 凡風寒欬嗽痰飲嘔惡脾

胃不和者宜此

六君子湯 補五

微溫 凡脾胃虛弱或久患瘧痢

或嘔吐吞酸者宜此

金水六君煎 新和一

微溫

凡陰虛受寒欬嘔喘促吞

酸痞滿等證宜此

平胃散 和十七

微溫

凡寒傷脾胃心腹脹滿嘔

惡不思飲食身體疼痛瀉利者宜此

藿香正氣散 和二十

微溫

凡外感風寒內停飲食頭

疼寒熱吐瀉脹滿者宜此

烏梅丸 和三二三

微溫

吐衄蛇厥者宜此

清理類

清火諸方

抽薪飲 新寒三

大寒 凡熱邪內蓄之甚者宜此

徙薪飲 新寒四

次寒 凡熱邪內蓄將甚未甚者

宜此

黃連解毒湯 寒一

大寒 凡熱邪內盛煩躁狂班口

渴舌焦喘滿脉洪熱甚者宜此

白虎湯 寒二

大寒 凡脉洪大渴陽明熱甚或

中暑虛煩等證宜此

人參白虎湯 寒三

大涼 凡赤斑口燥煩躁暑熱脉



洪大浮虛者宜此

三黃石膏湯

寒十一

大寒

凡疫癘大熱而躁者宜此

一六茸露散

新寒十五

大寒

陽明實熱煩躁斑黃等證

宜此

益元散

寒百十二

次寒

凡中暑身熱煩渴小水不

利者宜此

玉女煎

新寒十二

大寒

凡陰虛水虧陽明火盛煩

渴內熱者宜此

陽毒升麻湯

散百六

大涼

凡陽毒赤斑狂言失血者

宜此

竹葉石膏湯

寒五

微寒

陽明汗多而渴鼻衄喜水

暑熱煩躁者宜此

桂苓甘露飲

寒八

微寒

凡伏暑發熱煩躁水道不

利者宜此

黃芩清肺飲

寒三八

次寒

肺熱小水不利或便血者

宜此

大連翹飲

寒七八

次寒

凡風熱熱毒大小便不利

及瘡毒丹瘤等證宜此

會濟消毒飲

寒十三

大寒

凡疫癘大行憎寒壯熱頭

腫目閉喘渴咽喉不利俗名大頭瘟熱毒等證宜此

梔子麝皮湯

寒二三

大寒

傷寒身黃內外俱熱者宜

此

白頭翁湯

寒一八四

大寒

治傷寒熱利

玄參升麻湯

外四八

次寒

瘟疫頰腮腫痛發斑咽痛

者宜此

小陷胸湯

寒十六

微涼

凡小結胸熱邪脹滿者宜

此

八正散

寒百十五

大寒

凡心經蘊熱臟腑秘結小

便赤澀血淋等證宜此

解瘟疫熱毒法

寒二四

清血清便滋陰諸方

犀角地黃湯

寒七九

微涼

凡熱入血分吐衄斑黃及

血熱血燥不能作汗表不解者宜此

二陰煎

新補十

大涼

心經有熱狂笑煩熱失血

者宜此

加減一陰煎

新補九

大涼

凡水虧火盛煩熱動血者



宜此

五苓散

和一八二

微溫

凡暑熱霍亂泄瀉小水不

利濕腫脹滿者宜此

釋

導赤散

寒一二二

微涼

心火小腸熱秘小水不利

者宜此

大分清飲

新寒五

微寒

凡積熱閉結小水不通熱

瀉等證宜此

小分清飲

新和十

性平

凡小水不利濕滯腫脹泄

瀉者宜此

猪苓湯 和一八八

微涼 傷寒下後發熱小便不利

者宜此

清胃諸方

大和中飲 新和七

性平 凡邪結胃腕氣逆食滯者

宜此

小和中飲 新和八

性平 胸膈脹滿嘔惡氣滯者宜

此

小半夏茯苓湯 和九

微溫 膈間有水嘔吐心下痞者

宜此

半夏瀉心湯 寒二八

微涼 嘔而腸鳴心下痞者宜此

吐涌類

獨聖散 攻百六

凡邪實上焦及痰涎積蓄者宜此

茶調散 攻百七

治同前

吐劑 新攻一

此有二法便而且易可隨宜用之

梔子豉湯 寒二十

傷寒煩熱懊懣當吐者宜此

攻下類

峻下諸方

大承氣湯 攻一

凡陽明太陰傷寒及各經實熱內

結者宜此

小承氣湯

攻二

凡病在太陰無表證潮熱脉實狂

言腹脹者宜此

調胃承氣湯

攻三

凡太陽陽明不惡寒反惡熱潮熱

邪入腑者宜此

桃仁承氣湯

攻四

凡傷寒蓄血證小腹急痛大便不

通而黑者宜此

大柴胡湯

攻七

凡傷寒表證未除裏證又急當汗

下兼行者宜此



大陷胸湯 攻九

凡結胸脹痛連腹手足不可近者

宜此

六一順氣湯 攻八

凡傷寒熱邪傳裏便實口燥狂斑

潮熱腹脹鞭痛等證宜用此以代三承氣湯

涼膈散 攻十九

凡三焦六經火邪內結不通者宜

此

百順丸 新攻六

凡三焦熱秘邪不解者宜此

茵陳蒿湯 攻三一

穀疸發熱身黃便結者宜此

菴結胸法 新因三十

攻補兼用諸方

黃龍湯 攻二一

虛者宜此

玉燭散 攻二四

痛者宜此

培補類

峻補諸方

大補元煎 新補一

凡傷寒熱邪傳裏當下而氣血兼

凡血虛有滯而熱邪傳裏腹脹作

凡元氣太虛者雖有寒邪亦不可

攻必單培根本正復邪將自散或真寒假熱等證皆宜

用此

大營煎

新補十四

此大補元煎之次者也酌宜用之

三陰煎

新補十一

凡三陰不足及風瘧多汗而正氣

不復寒熱不止者宜此

六味回陽飲

新熱二

凡陰陽大虛元氣將脫者非此不

可

八珍湯

補十九

氣血兩虛者宜此

十全大補湯

補二十

凡氣血兩虛惡寒發熱倦臥眩暈

自汗諸虛者宜此

大建中湯 補二三

凡中氣不足厥逆嘔吐虛斑虛火

筋骨疼痛等證宜此

獨參湯 補三六

凡氣虛氣脫畏聞諸藥氣味及反

胃嘔吐垂危者惟此為宜

參附湯 補三八

凡真陽不足喘嘔呃逆腹痛厥冷

氣短者宜此

參歸湯 補三九

凡心虛血虛盜汗等證宜此

補陰諸方

一陰煎 新補八

凡腎水真陰不足而虛火為邪者



宜此

小營煎

新補十五

凡血少陰虛而無火者宜此

左歸飲

新補二

凡命門真陰虧損雖有寒邪不可

攻者宜此

右歸飲

新補三

凡命門陽衰或陰盛格陽感邪不

可攻者宜此

四物湯

補八

凡陰虛營弱病在血分者宜此

生脉散

補五七

凡熱傷元氣口渴氣短煩躁倦怠

汗出者宜此

六味地黃丸

補一

陰虛水虧發熱等證宜此

崔氏八味丸

補一二

凡陰盛格陽火不歸原及真陽虛

敗等證宜此

補中諸方

四君子湯

補一

凡脾胃虛弱食少體瘦瘧痢勞倦

等證宜此

五君子煎

新熱六

凡脾胃氣分虛弱而微寒當溫者

宜此

五味異功散

補四

凡脾胃虛寒飲食少思氣逆腹滿

者宜此

五福飲

新補六

凡五臟氣血俱虛者宜此為主

溫胃飲

新熱五

凡中寒嘔吐吞酸者宜此

養中煎

新熱四

凡中氣虛寒為嘔為泄者宜此

歸脾湯

補三三

凡脾虛健忘怔忡少食困倦瘧痢

等證宜此

參苓白朮散

補五五

凡脾胃虛弱吐瀉食少等證宜此

參朮湯

補四一

凡氣虛顛掉泄瀉嘔吐者宜此

景岳全書卷之八傷寒下終